

Kálag echë Paalε áténlé Baá Roma Ndibned n kálag

Kálag echë Paalε áténlé bad bé Roma ebédεε âboηsen bó áyāl e epe éche ántī'έ âpe á mwembé nme nádé áwed. Enén kálag elúmte chōm éche adúbe á Krīsto ne ngáne alongé á bad bé Krīsto átánǵéné abé. Paalε akoó ahób áwēdte aá, “Nkalan n bwám n lúmte nyaa eche Dyōb ábeléé boη bad békobnéd áwe e'só. Adúbe dōō ákæa boη bad békobnéd á'sō é' Dyōb” (1.17).

Paalε alúmté áte aá éhednad bán bad bésyāāl békobnad á'sō é' Dyōb áyāle bó moosyāāl bédé ásē e ngíne e mbéb. Aá mbwiined ne adúbe áde bédúbpé Yesu Krīstæa dōō nê ábenladté.

Paalε alúmté áte ámpē aá mod akude alongé dékōālē abé áde adíí mod nhóg ne Krīstæa. Ene ndín e mod abelé abé nsaη ne Dyōb, Edæádæη é Dyōb-pe ébelé éhúd mó ásē e ngíne e mbéb ne e kwééd. Asógté ne elébé éche ábágé bad ne mekenag nme ábágé Dyōb.

Nkabtéd n kálag

Ndibned ne atón áde kálag ékoo'έ ahób *1.1-17*

E'soósoη é'hednad ne moosyāāl *1.18-3.20*

Nzii e Dyōb ákud e'soósoη *3.21-4.25*

Alongé dékōālē ábé ne Krīstæa *5.1-8.39*

Bad bé Israel ne ntíi n Dyōb *9.1-11.36*

Abé á mod a Krīsto *12.1-15.13*

Nsógtēn ne melentēn *15.14-16.27*

Paale alómé melɛnten

¹ Mɛ, Paale, mbɛledɛ awě Yesu Krɪstəə, mɛ-ɛé ntelé enén kálag. Dyöb ápwédé mɛ ábē awě mbapɛɛ a nlómag, ábē-’ɛ mɛ nsón ákal rímē nkalanj m̄ bwám.

² Mmê nkalanj mós Dyöb dénhōbpē á’sō é’ póndé aá mósōbě ábē bad. Anláá bekal bé’dəódəŋ mam t̄ŋgene mímē nkalanj ngáne bétélé mós ášē á Kálag e echě Esáá. ³ Mmén nkalanj rídii t̄ŋgene awe Mwǎn. A nyaa e moonyon, ane Mwǎn anchyáád á mbyaa míme Dabidɛ. ⁴ A nyaa e Edəódəŋ, Dyöb dénlúméd á ngíne e Edəódəŋ éche Esáá aá mós adé Mwǎn a Dyöb, apuud áde ámpuúdté mós. Ane Mwǎn adii awɛd Sǎŋgwéé, Yesu Krɪstəə. ⁵ A d̄ŋn ádē dós Dyöb ábágé mɛ nsimé ábēl-le mɛ mbapɛɛ a nlómag ábēl boŋ bad ábe béesě bad bé Israel bédúbe, bəwógne-’ɛ Krɪstəə. Nén débēl áde d̄ŋn déwōŋ edúbé. ⁶ Nyémpē ábe nyédé á alonj á Roma, nyédé átintē e bad ábe Dyöb ápwédé aá bēbē bad ábe Yesu Krɪstəə.

⁷ Né-ós, ntenle nyé moosyáál awě adé á Roma. Nyédii bad ábe Dyöb ádáá, apwɛdé-’ɛ nyé, ábē ábē bad.

Nsimé ne nsanj míme ríhúú ne Dyöb, Titée awêd ne Sǎŋgú Yesu Krɪstəə m̄bê ne nyé.

Paale aságnan Dyöb

⁸ Dyam dé’sō, nságnan ádēm Dyöb áyāle nyé moosyáál á d̄ŋn áde Yesu Krɪstəə. Nságnan mós áyāle adúbe áde nyédúbpé Yesuɛ ákanlaad nkōŋsé áte r̄syāál. ⁹ Dyöb áde m̄benléé ne nlém nhóg akal áde r̄kaléé nkalanj m̄ bwám t̄ŋgene awe Mwǎn, áde mɛ mbóŋj nén aá nkamtan nyé akamtɛn ne akamtɛn, ¹⁰ póndé tée nzé nkānne’. Nkānne’ nén mɛé Dyöb

ábel ríhɛl nyé ahyɛ dényín, nzé nê ábóɔhɛndé mó.
¹¹ Ndə́ə́ bwám̄bwam mɛ́é rínyín nyé ábel boŋ nzé mpedé, ríwêd nyé áte ne nnam níme Edə́ə́dəŋ é Dyɔ́b ébágé mɛ. ¹² Dyam áde ríhóbeé ádíi nén mɛé, syánē mod-té áwêd nhóg ne aníníi nlém á abum. Adúbe ádēn áwêd mɛ nlém á abum, ádēm-mɛ ámpē áwêd nyé.

¹³ A-baányan, ndə́ə́ mɛé nyébíi bán nkénwōŋ mewēm̄tɛn ngen ne ngen áhyɛ dényín nyé, boŋ kóəŋ ne bə́ə́b nzii eénédnédéé. Ndə́ə́ mɛé nípe wê ábel nsón átínté echên níme méchyā́ e'pun melemlem ngáne mbéleé átínté e bad ábe béesě bad bé Israel bémpē. ¹⁴ Nsón níme ríwóó rídii ákale bad bésyā́l nkalan̄ mí bwám, ken bad bé dyad-ɛ, ké'ɛ bad bé ahín. Ntə́ŋgéné mó akal wéɛ bad ábe béwóó debyéé ne ábe béewóó. ¹⁵ Nê dó-'aá ákáo boŋ nwóŋ nlém bwám̄bwam ákale nyémpē ábe nyédé á Roma nkalan̄ mí bwám.

Nkalan̄ mí bwám ríwóó ngíne

¹⁶ Meekwágéé ákal nkalan̄ mí bwám áyāle móó rídé ngíne e Dyɔ́b echě epíínédé moosyā́l awě adúbpé mó e'soóson̄ mbooted ne bad bé Israel átímé' wéɛ bad ábe béesě bad bé Israel. ¹⁷ Mmén nkalan̄ mí bwám rílúmte' syánē nyaa eche Dyɔ́b ábeleé boŋ bad békobnéd áwe e'só. Bad békobnad á'sō é' Dyɔ́b adúbe áde bédúbpé. Adúbe dáo ákəə' boŋ bad békobnéd á'sō é' Dyɔ́b. Nén áde ne ngáne éténlédé á kálag e Dyɔ́b nén bán, “Mod awě aköbnédé á'sō é' Dyɔ́b adúbe áde adúbpé, ábē á alon̄gé.”

Moonyon̄ asyā́l abelé mbéb á'sō é' Dyɔ́b

18 Dyöb álúmte' nímē meliḡá. Mébidé ádyöb t̃ḡgene mbeltéd mé mbéb níme bad bébeléé ne e'bébtéd é' mekan ábe bad bébeléé. Mmē mbeltéd mé mbéb nkáá' bad áhíd mbále. 19 Dyöb álúmte' bó nímē meliḡá áyāle nén bébíí mam mésyāāl níme bad bét̃ḡgéné abíí t̃ḡgene Dyöb bwām áyāle Dyöb dēn álúmté bó. 20 Se á mbooted áde Dyöb dēnhəḡké nkōḡsé, bwēm ábe áhágé é'lúmte bad bwām nén bán mam mé Dyöb níme mod éēnyīnnēē dīd médé ne mbále. Enyīnnad-tē nén bán echē ngum edé á ngíndé ne á ngíndé, adé-ε ámín e bwēm ésyāāl. Né-ᵛó béēwóó'é mbámten ké nhóg ákud alagsen. 21 Kénéé bébíí bán Dyöb ádé, béebagéé mó edúbé néé Dyöb, béēsāgnān-naá mó. Boḡ pēn nímab mewēmtēn mēmbootéd mam níme méesē dyamdyam akamtēn, ehíntēn ékáá-ε bó mewēmtēn. 22 Béhóbe bán béwóó debyéé, boḡ bétímé e'yókél é' bad. 23 Bésóbé Dyöb áde ádé á ngíndé ne á ngíndé edúbé abε, bétímé bébage bwēm ábe bad béhágne mekáá á nwágēn mí bwēm ábe é'wāḡ, bwēm néε moonyoḡ, menōn, nyam ké'ε nyā.

24 Né-ᵛó, Dyöb átédte' aá esíí é mekan mé ekob é yāl ékamlan bó ábel mbinde é mekan éche ésudte bó edúbé. 25 Bétédte' mbále éche edé t̃ḡgene Dyöb béhíde' metóm. Bétédte' ábe Dyöb áde áhágé bwēm ésyāāl edúbé, bétímé bébage bwēm ábe áhágé. Dyöb dó-'aá bét̃ḡgéné mekenag abε á ngíndé ne á ngíndé. Ebê nê. 26 Né-ᵛó, Dyöb áhúdé bó mīd áyāl, atédte' bó aá béhíde' échab esíí ábel mekan mé mbinde. Bebaád bélyáge' bechóm anaḡned, béanaḡnad baachóm bémpēe, áde béēt̃ḡgenéé ábel nê. 27 Baachóm bómpē bélyáge' bebaád anaḡned

ngáne étǎngéné abé, béwōō' esíí é ngíne ânanjed baáb baachóm. Baachóm bébele mekan mé e'sôn ne baachóm bémpēe. Nê ábele' békudtad yǎl nkógsen níme bétǎngéné akud áyāle nímén mekan níme bébeleé.

²⁸ Ngáne édíí-'aá nén bán ábén bad béēwōñeé Dyōb pónde á alonǵé ádāb, Dyōb áhúde bó mǐd áyāl aá békeene nímad mewēmtēn mé mbéb á'sō, bébele mam níme béētēngēneé abel. ²⁹ Mbeltéd mé mbéb nísyāal níkáá bó nlém áte. Bébébé nlém, bédé ngoód, bélúmte e'béb bé nlém, bédé kónjí, béwúe bad, bédáá kǎkǎ, bédáá edogké, bédé akwáb, bédáá bad ahób ámbíd. ³⁰ Bédáá bad mam ahób á yǎl ábébed bó dǐn, békósó Dyōb, bésyāā bad, bédé epame, bédé kúmbe, bédāā' ebébtéd ahǵ, béēwōgnēē ábab besáá ne benyaá. ³¹ Bédé eyókél, béēlōntēē akag, béewóó'é edǎnge á nlém-té, béewóó-'áa nlém ní ngǎl. ³² Bébíí nén bán Dyōb áhóbé nén aá bad ábe bébele' échē ndín é mekan bétǎngéné awé, boñ kénē bédíí bébele níme mekan. Saá-kaá nê dēmpēn, békēmtē bad ábe bébele échē ndín é mekan kǎñne kémtén.

2

Bad bé Israel béēhídēē mbéndé

¹ Né-óó, nyé mod ké ahéé awé akáadte bad bémpēe, ábē kénzéé, eewóó'é mbámten ké nhǵ ákud alagsen. Ayāle nén nzé ekáadte bad áde mmōn ámpē ébeleé melemlem mé akan níme ekáadteé bó, né ekwide' kǎñne ehoñ yǎl nkáá.

² Debíí nén bán mbakú echē Dyōb ábídteé tǎngēne bad ábe bébele' échē ndín é mekan etǎngéné.

³ Bōōb-pǎó, nzé nyé mod ké ahéé abídte mbakú

áyāl e mod ampée, boŋ mwēn abele melemlem mé akan, awémténé aá móhēle móbíd mbakú e Dyöb áte-yε? ⁴ Ké'ε aboŋ áde Dyöb ábóó nlém bwámbwam, áchábtédé nyé e'kəd áte, áwesén-ne nyé, nyéetédεé dó nēε dyam. Nyébii nén bán e'boŋ bé nlém ábe Dyöb áwánlé áyāl echên, é'díí áε nyé etál áte de áden abé dé mbéb. ⁵ Nyélelé nlém á abum, nyééhédēē-'aá Dyöb atimēn, né-óó, nyéladte yäl nkógsen ní Dyöb áte. Akógsēn-ne nyé á Epun é nkáásé. Echê Epun Dyöb délüméd mímé melingá, alúméd-te aá mókáadte' nyaa echê etáŋgéné. ⁶ Asábē mod téé nchoo ne nsón míme ábéle. ⁷ Bad ábe bépéné mekuu ábel mam míme métáŋgéné ne áhed ehúmé ne edúbé, bébē á alongé á ngíndé ne á ngíndé. Echê ndín é bad Dyöb déβε bó alongé áde déemaá'. ⁸ Bad bémpēε-ε bédé ábe bétōŋtan dásō échab yäl, bébelelé mam míme métáŋgéné, bétímé bébele dásō e'bébtéd é' mekan. Echê ndín é bad, Dyöb délüméd bó mímé melingá akógsén-ne bó. ⁹ Baásyāāl ábe bébele mbéb, Dyöb débēl bétāg bwámbwam, bēwóg-ke ndutul, mbooted ne bad bé Israel átimé' wéε bad ábe béesē bad bé Israel. ¹⁰ Boŋ ne bad ábe bébele bwám, Dyöb déβε bó ehúmé, edúbé ne nsāŋ, mbooted ne bad bé Israel átimé' wéε bad ábe béesē bad bé Israel. ¹¹ Nyébii nén bán Dyöb déekwognádté modmod.

¹² Bad ábe béewóo mbéndé é Moseε, bébele mbéb. Dyöb dékáad-te bó ésebán abenlad mbéndé, bébōō'ε. Bad bé Israel-le, bó ábe bēwóo mbéndé é Mose, bébele mbéb, Dyöb débēnléd mbéndé ákáad bó. ¹³ Saké awóg áde mod áwógé mbéndé dās ákəə' boŋ ákobnéd á'sō é' Dyöb, ahíd áde mod

áhídeé échê mbéndé dṵṵ ákəə boŋ ákobnéd á'sō é' Dyöb. ¹⁴ Bad ábe béesě bad bé Israel, béewóó'ě mbéndé, boŋ pónde ké ehéé echě bėbėnlédé nımab mewēmten boŋ bėbel chöm éche mbéndé éhóbé, né bėlúmte nén bán kénée béewóó'ě mbéndé, áwab nlém-tê bėbíi nhəŋlén átınté e mboŋ ne mbėb. ¹⁵ Mmāb mbeltéd nlúmte nén bán chöm éche mbéndé éhedéé étėnlédé bó á nlém-tê, bėbíi-'ε nén bán nımab nlém nłāŋge bó bán édé nê. Mmab nlém nłúmte bó ké dyam áde bėbėlé ádé mbėb ké'ε ábóó. ¹⁶ Né-ṵṵ, á Epun é nkáásé, Dyöb dékāād bad bėsyāāl nchoo ne chöm éche bėkámtné ké'ε éche bėbėlé ké á kun-tê. Abε Yesue ene kunze ákáad bad. Adén akan dṵṵ nłāŋgeé bad nzé nkale' nkalaŋ mí bwām.

Bad bé Israel ne échab mbéndé

¹⁷ Bṵṵb-pṵṵ, nyé ábe nyéchəge yāl bán bad bé Israel, nyėsumé nlém áyāl e mbéndé éche Moseε, nyékumé-'ε ekáá á tāl bán Dyöb ádíi áden Dyöb. ¹⁸ Nyėbíi chöm éche Dyöb áhedéé aá nyėbel, nyėbíi-'ε nén bán nyėtāŋgéné née nyéhídé chöm éche étāŋgéné, ngáne nyėyágké mbéndé. ¹⁹ Nyėtédé yāl nén bán nyėē nyėlyágte bad ábe bėkwédé ndım abíi áde bėėbíi'ě Dyöb, nyėdúbpe bán nyėē nyėdé née etrukāŋ éche bad ábe bėdé á ehıntėn-tê. ²⁰ Nyėtédé yāl née bad ábe bėlébe' e'yókél é' bad. Bán nyė-'aá nyėyágte' bad ábe bėėbíi dyamdiam. Nyėtédé yāl nê áyāle nyėwėmtan bán ngáne nyėbíi mbéndé é Dyöb bwām, nyėbíi mekan mésyāāl, nyėbíi-'ε mbále. ²¹ Bṵṵb-pṵṵ, ngáne édíi bán nyėē nyėyágte bad bėmpēe, cheé ékáá boŋ nyėeyágté échen yāl?

Nyêkanle bad bán béēchībē', nyé bĕn nyéechībēé-ye? ²² Nyé ábe nyêlânge bad bán béēkábē mesón á ndáb e e'wóngé, nyébĕn nyéekábēé mesón-ε? Nyêκó abele á myōb mémpēe, boŋ nyéekāgkē á mebón mé myōb nyéchībē bwēm-ε? ^{*} ²³ Nyêkume ekáá á tâl bán nyêwóó mbéndé é Mose, boŋ nyésudte Dyōb edúbé abóo áde nyébóo'é éche mbéndé. ²⁴ Éténlédé á kálag e Dyōb nĕn bán, "Bad ábe béesĕ bad bé Israel béhóbe' Dyōb mam mé mbéb á yāl áyāle mekan níme nyébeleé."

²⁵ Nzé nyéhíde' mbéndé, né ayag áde nyéyagéé bad ákóó etógnĕn abé á'sō é' Dyōb. Boŋ nzé nyéehídé mbéndé, né ayag áde béyagéé nyé, déesaá dyamdiam. ²⁶ Bōōb-póó, nzé édé bán mod awĕ béeyagéé abele ngáne mbéndé éhédeé, né Dyōb dékob mó nĕe mod awĕ béyágé. ²⁷ Né-óó, bad ábe béhíde mbéndé kénĕe béeyagéé bó, bélúmte nyé bad bé Israel bán mekan níme nyébeleé méetângeĕé. Béyágé nyé, nyêwóó-ε mbéndé éche éténlédé á kálag, boŋ nyéehídéé chó. ²⁸ Nyébii-óó nĕn bán, saké bad ábe bétōmte' mekún álúmed nĕn bán bédé bad bé Dyōb bóó békóó bad bé Israel abé. Saá-kaá ayag áde béyágé mod á ekob é yāl éche ényínnad dóó ákəə' boŋ mod ákōŋ mod a Israel abé. ²⁹ Boŋ mod awĕ akōŋté mod a Israel abé adii mod awĕ adé mod a Israel á nlém-tĕ, nédĕ, mod awĕ béyágé á nlém-tĕ. Edəədəŋ é Dyōb chó-'aá ébele nímén nsón, saké ahíd áde mod áhídé mbéndé éche bétélé ásĕ. Dyōb dóó ákĕne' ene ndín e mod, saké baányoŋ.

* **2:22** Mebón níme bad bé' bōód mébédéé ndáb éche énwōŋ bwēm áte ábe é'lélé nkun.

3

Dyöb ábele ngáne dhábé

¹ Nsyáŋ ríhée-ṽ rídé ábé mod a Israel? Ké-'ε nyaa e nsyáŋ ehée edé áyag mod álúmed bán adé mod a Dyöb? ² Nsyáŋ rídé bwâmbwam. Dyam dé'só, áwab mekáá dṵṵ Dyöb dêmbeé éché eyale. ³ Ngáne édíí bán bó bad behóg bébele'aá ngáne Dyöb dénhöbpē aá bébel, nédē Dyöb dómpē déebenlé chöm éche ánhöbpē aá móṵbel-ε? ⁴ Eesaá nê. Kénéε moonyon asyáál ádíí nkal a metóm, Dyöb ádé mbále pónDé ésyā́l. Eténlédé á kálag e Dyöb nén bán,

“Nzé ehóbé dyam, bad bétáŋgéné anyín nén bán dyam áde éhóbé ádé mbále.

Nzé békáadte wε, ekáa nyaa echē etáŋgéné.”

⁵ Boŋ nzé édé nén bán mam mé mbéb míme débéléé mélúnte bwám bán Dyöb déekwognádté modmod, chán-nṵ déhöbpē? Nédē dehele dehób nén bán Dyöb ábéle awusé ákógsen syánē áyāle mbéb míme débélé-yε? (Debyéé á moonyon dṵṵ ríhóbneé nén.) ⁶ Eesaá nê. Nzé émbē nén bán nyaa eche Dyöb ákáadtéé edé awusé, né chán-nṵ áhele akáád nköŋsé? ⁷ Boŋ nzé édé nén bán dyam dé metóm áde ríkálé álúnte ngáne Dyöb ápédé mbále abé nyaa echē bad bébage-'aá mó ehúmé, né cheé-ṽ ékóá boŋ Dyöb ábé ákáádtē mε néε mod áwē abelé mbéb? ⁸ Cheé-ṽ syánē dééhöbēē nén bán, “Syánē débél mbéb ábel boŋ mboŋ rínýínned?” Donje á bad béhóbe syánē mam mé mbéb áyā́l bán dehóbé ádé akan. Dyöb dékógsen ábé bad ábe béhóbe nê nyaa éche etáŋgéné.

Modmod eébēlēē ngáne Dyöb áhedéé aá débél

9 Chán-nō syánē déhōbpē? Nyêwémtné bán syánē bad bé Israel detómé bad ábe béesě bad bé Israel-le? Eesaá nê. Mmaá alúmed nén meé ngine e mbéb ekamlan bad bé Israel ne bad ábe béesě bad bé Israel nyaa póg. ¹⁰ Eténlédé á kálag e Dyōb nén bán,

“Modmod eesaá áwe abele ngáne Dyōb áhedeé.
Mod ké nhóg eesaá.

¹¹ Mod eesaá awě asónténé mbále tângene Dyōb, modmod eesaá-'áá awě awane áte ábii Dyōb.

¹² Moosyáál abáá Dyōb á yǎl.

Bó moosyáál bétímé béwóó abé dé mbéb.

Bó modmod eébhēē dyam áde átáŋgéné. Bó mod ké nhóg mwēn eesaá.

¹³ E'yale ábe é'bide bó á nsəl é'dii néε soŋ echě béékútenéé.

Bébenlad échab echém é nsəl ádog bad. E'yale ábe é'bide bó á nsəl é'dii néε kem e píí e nyǎ.

¹⁴ Mbon é mehób ne e'bébtéd bé mehób bēn ne bēn bóó é'bide bó á nsəl.

¹⁵ Mekuú méhēnle bó ásē ásyog mekií.

¹⁶ Kéhéé áde bétóméé ebébtéd ne metake bóō bélyágeé.

¹⁷ Béēbíí'é nsan.

¹⁸ Béēwóó-'áa mbwóg ní Dyōb ké nhóg áte.”

¹⁹ Bōōb-pōó, debíí nén bán mekan míme bétélé á kálag e mbéndé, ménone bad bésyāāl ábe bēmbéé échē mbéndé. Né-óó modmod éēhēlē-se ádíbē nsəl áte áhób áá mósuu nzom. Ken mod a Israel, ké'ε mod awě eésē mod a Israel. Moosyáál átyēm á'sō é' Dyōb. ²⁰ Nyébii nén bán modmod éēhēlē-se ákobnéd á'sō é' Dyōb áyāle áhídeé mam míme mbéndé éhóbeé. Mbéndé edii dásō álúmed bad bán bēbéle mbéb.

Adúbe dǎǎ ákǎǎ boŋ bad békobnad á'sǎ é' Dyǒb

²¹ Boŋ bǎǎb dǎǎ Dyǒb álúmté syánē nzii echě bad békobnadté áwe e'sǎ. Ene nzii eewóǎ'é dyamdyam ábel ne mbéndé é Mosε. Echě mbéndé ne bekal bé'dǎǎdǎŋ béhǎbé mam tǎŋgene ene nzii se' bǎǎd. ²² Ene nzii edíi nén, mod ké ahéé awě adúbpé Yesu Krǐstǎǎ, mǎ akobnad á'sǎ é' Dyǒb. Nhǎŋlén ké nhǎg méesaá ken mod adé mod a Israel-lε, ken mod eésaá. ²³ Moosyǎǎl abelé mbéb, modmod eékwognedεé ákud ehúmé é Dyǒb. ²⁴ Nsimé ní Dyǒb mbéle Dyǒb átéde bad néε bad ábe békóbnédé áwe e'sǎ. Abagé nímé nsimé ngên. Abelé nê akǎde áde Yesu Krǐstǎǎ ákǎdté bad ábe bédúbpé mǎ. ²⁵ Dyǒb dǎmbě mǎ néε mendε aá áwě áwεn nló. Bad békǎd-tε alagsεn dé mbéb áyǎle bédúbpé mǎ. Dyǒb ábéle nê, ákoŋ bad bésyǎǎl alúmed nén aá móbele mekan nyaa echě etǎŋgéné. Ngen e'sǎ Dyǒb awésánnáá bad, eekǎgsan-naá bad ábe bébélé'áá mbéb. ²⁶ Bǎǎb-pǎǎ enén pǎndé, alúmte bad aá móbele' mekan nyaa echě etǎŋgéné, alúmte-ε bad aá mókǎb kénzεé awě adúbpé Yesuε.

²⁷ Ngáne edíi-'aá nê, cheé-ǎ dékumneé ekáá á tǎl? Nê déehεdnéé. Mbéndé ehéé ehǎbé nê? Dekume' ekáá á tǎl áyǎle déhídεé mbéndé-yε? Aáy. Deékúmεε ekáá á tǎl áyǎle nén, adúbe áde dédúbpé Yesuε dǎǎ ákǎǎ boŋ dékǎd e'soóson. ²⁸ Syánē denyíne nén bán mod akobnad á'sǎ é' Dyǒb adúbe áde adúbpé Yesu Krǐstǎǎ saké áyǎle ahíd áde áhídεé mbéndé. ²⁹ Ké-ε nyéwémtan nén bán Dyǒb ádíi Dyǒb á bad bé Israel dǎmpεn-ε? Saá mǎ adé kǎǎŋne Dyǒb á bad ábe béεš bad bé Israel-lε? Εε, mǎ adé kǎŋne Dyǒb á bad ábe béεš bad bé Israel. ³⁰ Dyǒb

ádii ahóg. Né-óó, ätēd bad ábe béyágé née bad ábe békóbnédé áwe e'só nzé bédúbpé Yesu Krīstæ. Melemlem née átēdtē bad ábe béeyagéé nzé bómpē bédúbpé Yesu Krīstæ. ³¹ Chán-nō déhōbpē bōob? Nédē dehóbe nēn bán atéd áde Dyōb átédé bad née bad ábe békóbnédé áwe e'só, adúbe áde bédúbpé Yesu Krīstæ álúmte nēn bán bad béēhīdē mbéndé ámpē-ye? Aáy, éesaá nê. Boŋ pen chōm éche mbéndé éhóbéé chōō syánē débánéé mekáá.

4

Adúbe dōo dēnkāŋ boŋ Dyōb ákob Abrahamε

¹ Chán-nō déhōbpē tēŋene taa awêd, Abrahamε? Cheé êmbenléd á póndé eché? ² Nzé ankobnéd á'sō é' Dyōb áyāle mekan míme ámbenlé, né anwōŋ dyam áde ákumneé ekáá á tâl. Boŋ eéhele'aá-se awōŋ dyam ké ahóg áde ákumneé ekáá á tâl á'sō é' Dyōb. ³ Eéhele'aá abel nê. Kálag e Dyōb ehóbé nēn aá “Abrahamε andúbé Dyōb, né-óó, Dyōb déntēd mó née mod awē akōbnédé áwe e'só.” ⁴ Nzé mod abelé nsón, bēbelé bésábé mó áyāle nsón míme ábélé. Mmê nsábe méēbāgkē ndε. Ndii chōm éche átēŋéné akud áyāle ebábé éche ásálté. ⁵ Boŋ nzé mod eébelē nsón boŋ asumé nlém nēn aá adúbe áde módúbpé Dyōb dōo débēl boŋ mókobnéd á'sō é' Dyōb, né Dyōb áde ábele boŋ bad ábe bēbelé mbéb békobnéd áwe e'só, dētēd mó née mod awē akōbnédé áwē e'só adúbe áde ádúbpé mó. ⁶ Melemlem nê dōo Dabidε ánhōbpē tēŋene nnam míme rídé ne bad ábe Dyōb átédé aá békóbnédé áwe e'só, kénéé édíí bán béebeléé nsón ké nhóg. ⁷ Dabidε anhób aá, “Nnam ne bad ábe Dyōb álágséné míma b mewusé boŋ abódéd míma b

mbéb. ⁸ Nnam ne mod awě Sáj Dyõbe éetúbpé mímē mbéb dīn ámpē.”

⁹ Nédē bad ábe báyágé bēnpēn bōō békūd mímē nnam míme Dabidē áhóbé, ngé bad ábe béeyagéé bómpē békud mó? Demaá ahób nēn bán kálag e Dyõb ehóbe aá, “Abrahamē andúbé Dyõb, né-ōó, Dyõb déntēd mó néē mod awě akõbnédé áwe e’só.” ¹⁰ Póndé ehéé Dyõb dēnchagké mó aá adé mod awě akõbnédé áwe e’só? Ade béēyāgēē mó, ngé áde bémáá mó ayag? Nê dēmbēnléd áde béēyāgēē mó. ¹¹ Bēn’yag mó áde Dyõb áamáá mó akob. Ayag áde bēn’yagké mó démbē e’chemléd ábe é’sógtan nēn bán akõbnédé á’sō é’ Dyõb adúbe áde adúbpé, kénéé édíí bán áde ānkobnédté á’sō é’ Dyõb bēnkēn’yagké mó. Nê ábédé ábēl boŋ Abrahamē ábé sáá a bad bésyāāl ábe béeyagéé, ábe békõbnédé á’sō e’ Dyõb adúbe áde bédúbpé Dyõb. ¹² Nê ábédé ámpē ábēl ábē-’ē sáá a bad ábe báyágé ábe bómpē bédúbpé Dyõb melemlem ngáne Abrahamē echēd sáj ándūbēē á póndé eche béēyāgēē mó.

*Adúbe dāō akāā’ boŋ mod
ákud chõm éche Dyõb áhóbé*

¹³ Dyam démpēe áde débíí ádíi nēn bán, se’ bōód Dyõb dénlāā Abrahamē ne míme nchyaátén aá mósõbē nkõŋsé áwab mekáá. Dyõb dénkēnhóbpé nēn áyāle Abrahamē áhídé’áá éche mbéndé. Dyõb dénhõb nê áyāle Abrahamē andúbé mó, Dyõb átéd-
te mó néē mod awě akõbnédé áwe e’só. ¹⁴ Nzé émbē nēn bán bad ábe bēhíde mbéndé bōō békūd chõm éche Dyõb áhóbé aá mósõbē, né adúbe áde bad bédúbpé Dyõb ádé ngēn. Né chõm éche Dyõb

áhóbe'-ε áá mós̄bĕ ěesaá dyaṃdyaṃ. ¹⁵ Chõm éche mbéndé ébεεé édii dásō ápiined bad meliṅgá mé Dyõb. Boṅ nzé mbéndé eésē, abóo á mbéndé déebāgkē. ¹⁶ Nê dós-'áá ákóó boṅ Dyõb álāṅgē dásō bad ábe bédúbpé mós̄ áá mós̄bĕl dyaṃ áde móhóbe. Abelé nê âbel boṅ ényined nén bán míme nsimé mós̄ níkáá boṅ álāṅgē nchyaátén míme Abrahamε ngen póg ne ngen ésyāēl áá mós̄belé bó dyaṃ áde móhóbe. Saké bad ábe béhíde mbéndé bēṅpεn bós̄ âmbεé akag. Ambε kóáṅne bad bésyāēl ábe bédúbpé Dyõb ngáne Abrahamε ándübēē. Abrahamε adii sáá awĕ syánē moosyāēl. ¹⁷ Eténlédé á kálag e Dyõb nén bán Dyõb dénllāā Abrahamε áá, “Mbélé wε sáá a meloṅ híin.” Né-óó, Abrahamε mó adé syánē sáá á'sō é' Dyõb. Dyõb áde Abrahamε ádúbpé dós̄ adé Dyõb áde ábage bad ábe bēwédé alongé, dós-'áá áhóbe' boṅ mekan míme méesĕ mébé. ¹⁸ Abrahamε andúbé Dyõb ásūm-mε míme nlém áwē, kénεé édii bán á mĭd mé moonyoṅ, nzom ké póg enkēmbáá echĕ elūmte bán mam míme Dyõb dénhōbpē áá mébenléd mébenléd-tε. Andúbé áá mós̄bē “Sáá a meloṅ híin” ngáne Dyõb dénllāā'é mó áá, “Mmōṅ nchyaátén mébuú áte néε betintine.” ¹⁹ Ade Dyõb álāṅgé Abrahamε nê, ambé dyaṃ mbwókel e mwĕ. Ambíí áá mós̄lyagεé moonyoṅ ámpē, abíí'-ε áá mwaád Seraa adé ekom. Boṅ ké nê, adúbe dénkēsudté mó. ²⁰ Nlém méehúne'áá mó tâṅgene dyaṃ áde Dyõb dénhōbpē áá mós̄belé mó, boṅ adúbe dénwēd mó áte, ábagé Dyõb ehúmé. ²¹ Ammād áwe nlém-tē nén áá Dyõb débĕl chõm éche áhóbe' áá mós̄bĕl. ²² Né-óó, adúbe áde Abrahamε dénkāṅ Dyõb déntēd mó néε mod awĕ abεle mekan ngáne Dyõb áhedεé. ²³ Bōob-póó,

e'yale ábe é'ténlédé nén bán, “Dyöb déntēd mó née mod awē abele mekan ngáne áhedéé” béesaá áyāle Abrahamε mwēmpen. ²⁴ Abê e'yale é'dé áyāl e syánē ámpē. Dyöb déntēd syánē ámpē ábe dedúbpé née ábe bad, mó apuúdté Yesu Krīstæ, Sāngwéé awêd. ²⁵ Krīstæ mósó Dyöb dêmbéé aá áwê áyāle mbéb mímēd. Dyöb ápuúdté mó ábel boḡ dékud nzii ákobned á'sō é' Dyöb.

5

Depedé á nchemten ne Dyöb

¹ Né-óó, ngáne édíí bán adúbe áde dédúbpé ábélé Dyöb átédé syánē née bad ábe békóbnédé áwe e'só, syánē dedé nsaḡ ne Dyöb. Echēd Sāḡ, Yesu Krīstæ mó akáá boḡ debé nsaḡ ne Dyöb. ² Mósó-áa adíbnédé syánē nzii echē adúbe áde dédúbpé ábélé boḡ syánē debíí nsimé ní Dyöb. Né-óó, dedé menyinḡe bwāmbwam áyāle desumé nlém nén bán dēéküđ ehúmé é Dyöb. ³ Dedé menyinḡe ámpē áyāl e metake míme dékudéé, debíí nén bán metake mépεene' e'wéd bé nlém. ⁴ E'wéd bé nlém-me é'bēle dewóḡ abé áde ákobnad ne Dyöb. Adê akobned áde dékobnadté-ε á'sō é' Dyöb dós-áa ábele boḡ dewóḡ e'lyág bé nlém nén bán Dyöb débēl chöm éche áhóbé aá mósóbelé syánē. ⁵ Nzé delyáge-ε nlém, déebídté mekáá mé ngên áyāle nén, Dyöb álúmté syánē ngáne ápédé syánē adəḡ abel áde ábélé boḡ echē edəḡe ésól syánē á nlém-tē. Abelé nén abε áde ábágé syánē echē Edáədəḡ éche Esáá.

⁶ Ade dénkênwóngé ngíne ké póg áwóngen éche syánē yāl, Krīstæ anwé á nló mímēd, bebel bé mbéb á pónde eche Dyöb déntíí'é. ⁷ Elélé áte mod áwé á

nló ní mod awě abele' mekan níme métəngéné á'sō é' Dyǒb. Kapóg-ke mod ahēle ákwentén áwê á nló ní mod a bwám. ⁸ Boŋ Dyǒb álúmté syánē aá módáá syánē áyāle nén amběl aá Krístəə áwê á nló nímēd áde dédíi débédé bebəl bé mbéb. ⁹ Dekǒbnédé á'sō é' Dyǒb áyāle mekií níme Yesuε níme mésyógké á nló nímēd. Nzé mekií níme Yesuε níme mésyógké á nló nímēd mébélé dekǒbnédé á'sō e' Dyǒb, nén déélúmtēē syánē bán Krístəə ätōm syánē asoŋ nê ásē e meliŋgá mé Dyǒb-ε? ¹⁰ Ade débédé bad bé ekoyí bé Dyǒb, kwééd echě awe Mwän áwédé embəl dépē á nchemtən ne mó. Ngáne édíí-'aá bán depedé á nchemtən ne Dyǒb, abé áde awe Mwän ádíí á alongé, á asóg, äsoŋ syánē. ¹¹ Saá-kaá nê dēmpən, boŋ dewóge menyinŋe áyāle Dyǒb ábélé syánē dedé ábē bad, mbwiined ne echəd Sán Yesu Krístəə, mó awě akəá boŋ debé á nchemtən ne Dyǒb.

Nhəŋlén níme ndé átínté e Adame bó Krístəə

¹² Mod nhóg mó amběl boŋ mbéb nίpe á nkǒŋsé-te, mbéb mó-'aá nίpééné kwééd. Né-ǒǒ, moosyáál awág áyāle moonyoŋ asyáál abelé mbéb. ¹³ Dyǒb ádēhób aá móbage bad mbéndé, né bad bébele mbéb á nkǒŋsé-te. Boŋ kéhéé wéε mbéndé éesaá, modmod éēhēlēē-sε ahób aá mod abóó mbéndé. ¹⁴ Boŋ kénê, bootya á pónDé eche Adame ápe á pónDé eche Mosεε, pónDé eche Dyǒb ábágé mbéndé, kwééd enwóŋ ngíne ámín e moonyoŋ asyáál. Bad béwágáá kénê bēnkēmbóó'é mbéndé e Dyǒb melemlen ngáne Adame ámbōō'é.

Adame abédé á nwágén nίme ane awě antəngén ape, nédē Krístəə. ¹⁵ Abé bad bébe béesaá nyaa

póg, áyāle nēn ndε echē Dyöb ábágé bad ngên, eche Yesu Krīstæ áπέένé, eésaa melemlem nēngáne dyam áde mbéb míme Adamε mēmpεένné. Edé mbále bán bad híin béwédé áyāle mbéb míme mod nhóg ábélé. Boη nsimé ní Dyöb ríchábé ámīn bwāmbwam tómaa nímē mbéb. Bad híin békúdé ndε e Dyöb ngên nyaa echē echabé ámīn, ámbīd e mod nhóg, Yesu Krīstæ. ¹⁶ Ndε e Dyöb-πε ámpē eésaa melemlem néε dyam áde mbéb míme Adamε âmbenlé dēmpεένné. Mmē mbéb nhóg míme Adamε ríkás moosyā́l akwedé nkáá á'sō é' Dyöb. Boη ene ndε ekás Dyöb átédé bad néε bad ábe békóbnédé awē e'só, kénéε édíí bán bad bébele mbéb abel ne abel. ¹⁷ Edé mbále bán mbéb míme mod nhóg Adamε âmbenlé, mbélé bad bésyā́l bédé ásē e ngíne e kwééd. Boη akan áde aníníí mod nhóg, Yesu Krīstæ ábélé, átómténé ngíne abé. Nēn dēbēl bad bésyā́l ábe békúdé nsimé ní Dyöb míme ríchábé ámīn békobnéd-tε áwe e'só békūd alongé áde déemaá', béwóη ngíne ámīn e chōm ésyā́l. ¹⁸ Né-ζó, nímē mbéb nhóg míme Adamε âmbenlé, mēmbēl Dyöb dēnkwid baasyā́l nkáá. Melemlem nē dōo dyam á bwām ahóg áde Krīstæ ábélé dēmbenlé bad bésyā́l békobnéd á'sō é' Dyöb, békūd-tε alongé. ¹⁹ Awógen áde mod nhóg, Adamε, énkēnwógénné Dyöb dēmbēl moonyōη asyā́l ambé mod a mbéb. Melemlem nē dōo awógen áde mod nhóg, Krīstæ áwógné Dyöb, ábélé bad híin békóbnédé á'sō é' Dyöb. ²⁰ Dyöb dēmpεέν mbéndé ábel abel dé mbéb ákag á'sō. Boη kéhéé wée abel dé mbéb ákagké á'sō, nsimé ní Dyöb mbelé ríkag á'sō tómaa nē. ²¹ Né-ζó, ngáne mbéb ríwóó ngíne áπεεn kwééd, nē dōo nsimé ní

Dyõb móm̄pē níwóó ngíne âbel bon̄ bad békobned á'sõ é' Dyõb, békud alongé áde déemaá' mbwiined ne Yesu Kr̄stæ, Sångwéé awêd.

6

Mbéb níwúú syánē bon̄ Yesuε apuúdté syánē

¹ Chán-nō déhōbpē bōob? Edé bán débê débēle mbéb âbel bon̄ nsimé ní Dyõb níhágke-ε? ² Aáy éesaá nê. Syáā dewédé, deewóó'ε dyamdyam abel ne mbéb ámpē. Chán-nō déhele debé débēlé' mbéb? ³ Nyéebíí'é nén bán áde dékúdé edusen bon̄ debé mod nhóg ne Kr̄stæ denwé ne mó-yε? ⁴ Edusen éche syánē dēnkudté, élúmte' bán syánē dewédé, bélímé-ε syánē ne mó. Nén dēmbēnléd âbel bon̄ déwōn̄ abé dékōlē. Nén áde melemlen ne ngáne Titée apuúdté Kr̄stæ ne éche ehúmé á alongé dékōlē. ⁵ Nzé syánē dedé nhóg ne mó áyāl e eche kwééd né syánē débē nhóg ámpē ne mó áde apuú'ε. ⁶ Debíí bán áde bēmboméé Kr̄stæ á awōg, bēmbomnéd mó abé áde dénwōngē bōód. Abel bon̄ ngíne echē ádé abé dé' bōód áde ábéltaa syánē mbéb ébōó ne abōó ásyāāl. Nén débēl mbéb méetédte syánē ntān̄ ámpē. ⁷ Nzé mod awédé, mbéb méekamlánné mó ámpē. ⁸ Bōob-pōó, ngáne dewédé ne Kr̄stæ, dedúbpé bán dēbē á alongé ne mó. ⁹ Syánē dedúbpé nê áyāle debíí bán Kr̄stæ apuúdé, éewáá-'áá ámpē. Kwééd eewóó-'áá ngíne ké póg ámín echē ámpē. ¹⁰ Awé áde awédé, mbéb méewóó'ε dyam ké ahóg abel ne mó ámpē. Alongé áde ádíí-ε áte bōob ádíi alongé áde ádíí ne Dyõb. ¹¹ Melemlen nê dōó nyémpē nyétāngéné yāl anyín nēε bad ábe bēwédé, âbel bon̄ mbéb méekamlán

nyé ámpē. Nyényín-ne yǎl née bad ábe bédé á alongé ne Dyöb mbwiined ne Yesu Krístə.

¹² Né-ɔ́, nyéemwāg se mbéb ríkamlán echɛn yǎl e moonyon eché éwág. Nê débĕl nyéehídéé mekan mé esíí mé ekob é yǎl ámpē. ¹³ Nyéetāngɛnɛ́-é née nyétédté echĕn pɛd e yǎl ké póg á mbéb-te se nyébenléd chó ábel mekan mé mbéb. Bon pɛn, nyébe yǎl wée Dyöb née bad ábe bébídte á kwéédte, bon bébe bó alongé dékɔ́lĕ. Nyébe echɛn yǎl esyáál á mekáá mé Dyöb ábel bon ábenlad nyé ábel mekan míme métāngéné á'só é' Dyöb. ¹⁴ Mbéb méetāngɛnɛ́ née ríkámléné nyé. Nyéesaá ásē e mbéndé bon nyĕdé ásē e nsimé rí Dyöb.

Débĕ betān ábel mekan ngáne Dyöb áhedé

¹⁵ Chán-nō déhɔ́bpē bɔ́ɔb? Ngáne dédíí ásē e nsimé rí Dyöb, nédē débĕ débĕle mbéb áyāle deesaá ásē e mbéndé ámpē-yɛ? Aáy, éesaá nê. ¹⁶ Nyéebii'é bán nzé mod abagé yǎl née ntān ásē e mod ampée, ábel kéchéé éche ane mod áhóbéé, né adíi ntān awĕ ane mod-ɛ? Bad ábe bébágé yǎl ábel mekan mé mbéb, chĕm éche békudéé édíi kwééd. Bon mod awĕ abagé yǎl ábel ngáne Dyöb áhedéé, abág mod awĕ abele mekan míme métāngéné á'só é' Dyöb. ¹⁷ Nságnɛn mĭbĕ ne Dyöb. Nyé ábe nyĕmbé betān ásē e mbéb, nyĕtimé nyĕhíde mbále e mekan mésyāál míme béyágté nyé ne nlém nhóg. ¹⁸ Bɔ́ɔb-pɛ áde Dyöb áhúdé nyé ásē e ngíne e mbéb nyĕtime betān, ábel mekan ngáne Dyöb áhedéé. ¹⁹ Nhóbe mímén mésyāál á nyaa e moonyon áyāle nĕn nyé nĕngáne baányon, nsōntɛn méechabéé nyé ámĭn. Ngen e'só, nyĕmbĕ echɛn yǎl esyáál née betān, nyébelé mbinde é mekan ne e'bébtéd é

mekan, nyébelé-'ε ebébtéd chèn ne chèn, nyékag á'sō. Bɔɔb-pɔɔ nyétàngéné echen yəl esyáál abe néε betân, âbel mekan ngáne Dyöb áhedéé, nén débël alongé ádēn désān. ²⁰ Ngen e'só áde nyébédé betân ásē e mbéb, nyênkênwóngé dyam abelen mekan míme Dyöb áhedéé aá nyébel. ²¹ Nsyáñ ríhéé nyênkudté áde nyébéláá mekan míme mékwágte nyé bɔɔb. Chöm éche mímé mekan mépεεεé édii kwééd. ²² Bɔñ bɔɔb, Dyöb áhúdé nyé ásē e ngíne e mbéb, betân bé Dyöb-paá nyédíí. Nsyáñ míme nyékudéé rídii nén bán Dyöb ábélé nyésáá ngáne ábē bad bétàngéné asān. Nê débël nyéĕküd alongé áde déemaá'. ²³ Nyébii nén bán nsábe míme mbéb mípεεεé rídii kwééd. Bɔñ ndε echē Dyöb ábagéé bad ngên edii alongé áde déemaá'. Dekude dós, abé áde dédíí ne Yesu Krístəə, Sánḡwéé awêd.

7

Bad bé Krísto béesaá ásē e mbéndé ámpē

¹ A-baányan, nyédíí bad ábe búbíí mbéndé. Nyéebíí'é bán mbéndé ekamlan mod dásā á pónde eche ádíí á alongé-yε? ² Détêd eláñsén áyāl e ehób é e'wóngé. Nzé mmwaád awóó nchóm, mbéndé ehóbe nén bán atàngéné abé ne nchóm pónde esyáál eche nchóm ádíí á alongé. Bɔñ nzé nchóm awédé, mbéndé e e'wóngé eekóbéé mó ámpē. ³ Né-ɔɔ, nzé adyééne mod ampée áde nchóm ádíí ádíí á alongé né béchag mó bán ádíí nkáb-a-meson. Bɔñ nzé nchóm awédé né awóó kunze á'sō é' mbéndé, nzé awóó-'ε nchóm ampée, ene pónde, né eekábeé asón. ⁴ A-baányan, nê dós édíí ne nyémpē. Mbéndé eekamlánné nyé ámpē áyāle

awé áde Yesue áwédé, nyémpē nyêwédé. Bɔɔb-pɔɔ, nyédii bad ábe mod ampée, Yesue awě Dyɔb ápuúdté, ábel boŋ nyébele Dyɔb bwâm. ⁵ Ayāle á pónde eche áded abé á moonyoŋ ákamlánnáá syánē, mbéndé epuúdté'áá syánē esíí é mekan mé ekob é yāl áte. Nén ábéláá débélé' mekan mé mbéb míme mépεene' kwééd. ⁶ Boŋ bɔɔb dehídté ásē e mbéndé, awé áde déwédé. Né-ɔɔ, mbéndé echě ekámlánnáá syánē néε betāŋ eékamlánné ne syánē ámpē. Nén ábélé dehíde dásɔ nzii ekóólé bɔɔb ábele Dyɔb. Debenle mó nyaa echě Edáádəŋ é Dyɔb élāŋgέé syánē, saké nhítεn ne mbéndé éche bétélé ásē.

Mbéndé e Dyɔb chā elúmte' syánē mímed mbéb

⁷ Chán-nɔ déhɔbpē bɔɔb? Nédē déhɔb bán mbéndé edé mbéb-ε? Aáy, deéhélεε-se dehób nê. Boŋ mbéndé chó ekáɔ boŋ mbíi chǒm éche mbéb rídíi. Nzé mbéndé enkēnhób áá mod eesíidé chǒm é mod, né meebíi' é nēn mεé ásíi chǒm é mod áde mbéb. ⁸ Boŋ ene mbéndé ennyēm mε mewēmten mé mbéb ásē, ébel níbootéd bwēm é' bad asíi nyaa ne nyaa. Nzé mbéndé eésě, né mbéb méesaá dyamdyam. ⁹ Pónde ebédé echě ménkēmbíi' é mbéndé. Boŋ á pónde echě mbíi mbéndé, esíí é abel dé mbéb ěmpuú mε áte, nwé-'ε. ¹⁰ Mbéndé eche Dyɔb ábágé áá chóɔ epεene alongé chóchó étím mε awúu. ¹¹ Mbéb mēnkud etál ámbíd e mbéndé, rídōg mε, mbél mbéb. Né-ɔɔ mbéb móɔ ríwúu mε.

¹² Né-ɔɔ, denyíne nēn bán mbéndé chēn esáá, chǒm-εε mbéndé éhóbéé esáá, étāŋgéné, édé-'ε bwâm. ¹³ Nédē nê álúmte nēn bán chǒm éche édé bwâm étímé mε nê kwééd apiined-ε? Aáy,

éesaá nê. Saké mbéndé ch́o epíínédé me kwééd, mbéb ḿóó ḿpóó ámbíd e mbéndé, ch́om echě edé bwám, ápiined me kwééd. Nén dēmbēnléd ábel nén bad bényín ngáne mbéb rídíí. Né-óó, mbéndé e Dyöb ebele' mbéb rílúmte eche ngíne bwámbwam.

Nzum echě ewante' moonyonj áte

¹⁴ Debíí nén bán mbéndé eche déhóbeé edíi ch́om é edáádəŋ. Boŋ ndíi moonyonj a ekob. Ndíi née mod awě bésómé ásē e mbéb née ntāŋ.

¹⁵ Meesónjtánné mbeltéd nímēm. Mam níme ríhedéé abel, meébēlēē ḿó. Mam níme ríkóó ḿóó rítiméé abel. ¹⁶ Bóob-póó, abel áde ríbeléé ch́om éche méehédéé abel, nén álúmte bán nkwěnténé meé mbéndé edé bwám. ¹⁷ Boŋ á mbále saké mměn nkoo' abel, mbéb níme rídé me áte ḿóó ríbelte me nê.

¹⁸ Mbíí meé dyam á bwám ké ahóg déesaá me áte, nédē, ne nlém mí moonyonj níme ríwóó, kénée edíí bán nlém rídé me áte ábel dyam á bwám, meéhēlēē d́ó abel. ¹⁹ Meébēlēē dyam á bwám áde rídáá abel, boŋ dyam dé mbéb áde méehédéé abel, d́óó rítiméé abel. ²⁰ Bóob-póó abel áde ríbeléé dyam áde méehédéé abel, nén alúmte nén bán saké mměn nkoo' nímē mam abel ámpē. Boŋ mbéb níme rídé me áte ḿóó ríbelte me ḿó.

²¹ Né-óó, nnyíne nén meé mbéndé edé echě ekamlan me. Póndé téé áde ríhedéé dyam á bwám abel, mbéb ḿóó ríwámsan me ekáá ape. ²² Awēm nlém-tê, mbéndé e Dyöb ch́óó rídáá ahíd ne nlém rísyāāl. ²³ Boŋ nnyíne nén meé mbéndé empée edé echě ekamlan échēm ekob é yāl, echě ewane nzum ne mbéndé echě nímēm nlém rídáá. Ene mbéndé ehaá me, ebelé-'e ndé ntāŋ a mbéb. Mmē mbéb ḿó-'áá nkamlan échēm ekob é yāl. ²⁴ Ebál é

etyəg éche étáné me! Nzé-módé əsəŋ me á mekáá mé échén ekob é yəl, éche épiinad me kwééd?
²⁵ Nságnen mbê ne Dyöb. Asoó ádêm alongé mbwined ne Mwän, awed Sáŋgwéé, Yesu Krístəə. Né-əó, mməmpen ndé mbíd ébe, nímêm nlém rílanġe me áhíd mbéndé é Dyöb bonj échêm ekob é yəl éhíde mbéb níme rídé me áte.

8

Alongé áde Edəádəŋ é Dyöb ébagéé

¹ Bəəb-pəó, Dyöb déekwidéé modmod nkáá awé adé nhóg ne Yesu Krístəə. ² Mbéndé e Edəádəŋ echê epiinad syánē alongé, abé áde dédíí ne Yesu Krístəə, ehúdé me á mehanj mé mbéndé e mbéb ne á mekáá mé kwééd. ³ Mbéndé enkênhenlé mbéb amad áyāle nén baányonj bénkênwónġé ngíne áhíd chó. Né-əó, Dyöb ábélé dyam áde mbéndé énkênhenlé abel. Anlóm awe Mwän ne ekob é yəl e moonyonj éche ébele mbéb, ábóded ngíne e mbéb. Abel áde Dyöb dēmbenlé nén dēmbōdēd ngíne e mbéb ámīn e moonyonj a ekob. ⁴ Dyöb dēmbel nê ábel bonj bad ábe béehídē mam ne ngíne e moonyonj bonj bétimé' béhídē mekan ne ngíne e Edəádəŋ é Dyöb, bébel mekan nyaa echê etánġéné melemlem ngáne mbéndé ehóbéé aá bébel. ⁵ Bad ábe bébele mekan ngáne écháb ekob é yəl élanġéé bó, bébelé bésúmm nímab nlém áyāl e mekan mé ekob é yəl. Bonj bad ábe bébele mekan ngáne Edəádəŋ é Dyöb élanġéé bó, bébelé bésúmm nímab nlém áyāl e Edəádəŋ é Dyöb. ⁶ Nzé mod asúmmé nlém áyāl e mekan mé ekob é yəl, né əwē. Bonj nzé mod asúmmé nlém áyāl e mekan mé Edəádəŋ né Dyöb débe mó alongé áde déemaá' ne nsan. ⁷ Nzé

mekan mé ekob é yǎl mékamlan mod, ane mod abelé ákōō Dyōb áyāle eehídéé mbéndé é Dyōb, eéhēlē-’aá chō ahíd ne ahíd dēn. ⁸ Nén álúmte bán bad ábe béhíde échab esíí é mekan mé ekob é yǎl, béehelée Dyōb menyinje awóged.

⁹ Boḡ ne nyé, nyéēbēlēē mekan ngáne ekob é yǎl éhedeé aá nyébel. Nyébele’ dásō ngáne Edáádəḡ éhedeé aá nyébel, nzé édé bán ne mbále Edáádəḡ é Dyōb édé nyé áte. Kénzée awē Edáádəḡ éche Krístəá éesaá áte, né éesaá ne Krístəá. ¹⁰ Boḡ nzé Krístəá adé nyé áte, nyédé á alonḡé áyāle Krístəá abelé nyékōbnédé á’sō é’ Dyōb kénée édíí bán échēn ekob é yǎl éwē áyāle mbéb míme nyébélé. ¹¹ Nzé Edáádəḡ éche Dyōb áde dēmpuúđ Yesue édé nyé áte, né ké échēn ekob é yǎl éche éwág êmmad awé, né Dyōb áde ápuúdté Krístəá dépuúđ chō. Abel nén á ngíne e Edáádəḡ éche édé nyé áte.

¹² Né-ōó, A-baányan, dyam áde áde détəḡḡéné ahíd déesaá dyam dé ekob é yǎl, saké ábé ngáne ekob é yǎl éhedeé. ¹³ Ayāle nzé nyébele ngáne ekob é yǎl éhedeé né nyéēwē. Boḡ nzé á ngíne e Edáádəḡ é Dyōb nyēwúú mbeltéd mé mbéb míme nyébelée, né nyéékūđ alonḡé. ¹⁴ Dyam áde áde ádíí nén, bad bésyāāl ábe Edáádəḡ é Dyōb élyáḡtéé, bédíí bán bé Dyōb. ¹⁵ Edáádəḡ éche Dyōb ábágé nyé éebelée-se nyébé née betāḡ, nyébé á mbwōḡ-te. Boḡ pən Edáádəḡ é Dyōb ébélé nyékoó bán bé Dyōb abé. Ngíne echē échē Edáádəḡ chō-’aá ekáó boḡ délēbpē Dyōb bán, “A-Tê! Echem Sánj!” ¹⁶ Edáádəḡ é Dyōb ébélé syánē debíí á nlém-tē nén bán dedíí bán bé Dyōb. ¹⁷ Bōōb-pōó, ngáne dédíí ábe bán, deékūđ nnam míme Dyōb ákōḡnédé ábē bán, syánē deékūđ-te bwēm ábe Dyōb ákōḡnédé

mó, nzé ne mbále syánē dekwěnténé âtag ne Krístəə âbel syánē ámpē dékud ehúmé éche Dyöb débéé mó.

Ehúmé éche bad bé Dyöb békudté

¹⁸ Nnyíne' nén mée, metake níme dékudéé bəəb méesaá dyamdyam nzé béhəgténé mó ne ehúmé éche bélūmēdtē syánē á pónde echē ehúe á'sō. ¹⁹ Bwēm ábe Dyöb áhəgé á nkōŋsé é'sine' ne e'lyág bé nlém, pónde echē Dyöb délūmtēnnē ábe bān. Abēl nē ne ehúmé ésyā́l. ²⁰ Embē nén bán bwēm ábe béhəgé é'dii ehóhó ngēn. Saké ábē bwēm bēn bəə bēntīl bán ébē nē boŋ Dyöb dəə déntīi. Ambel nē ne e'lyág bé nlém aá epun épě éche ²¹ mōhūdtē ábē bwēm bēn á mehaŋ mé ngíne echē ebəədte bwēm, bəmpē békūd-te kunze ákud melemlem mé ehúmé éche Dyöb ábageé ábē bān. ²² Debíi nén bán káəŋ ne' bəəb, bwēm é'syā́l é'kəne' ne e'wε ábe bəwógeé ábe é'dé nēŋgáne e'wε bé achád. ²³ Boŋ saké nhəgtéd mwēmpen níkəne'. Syánē bēn awē dewóó Edəádəŋ éche Dyöb ábágé syánē nēŋgáne nde e'só, syánē ámpē dekəne' á nlém-tē. Debānné nlém nísyā́l ásin pónde echē Dyöb débenlé boŋ dékōŋ ábe bān abé, ahúd syánē yál esyā́l á mehaŋ-tē, ábe syánē yál ékə́lē. ²⁴ Taasε dekude e'soosəŋ delyágé nlém bán deékūd chōm éche Dyöb áhóbé aá mósə́l. Boŋ pen nzé denyíne chōm éche delyágé nlém bán deékūd, né saké e'lyág bé nlém bəə é'kóó abé nē. Nzé-módé ahele alyág nlém áyāl e chōm éche ámáá akud? ²⁵ Boŋ, dechedé yál ásin chōm éche déenyīnē, deko-ε chó asin.

²⁶ Melemlem nē dəə Edəádəŋ é Dyöb éwōŋganné syánē áyāle deewóó'é ngíne. Deebíi'é ngáne

détəŋɡéné akáne boŋ Edəádəŋ chən chóo ékânnad syánē ne nheemed míme rítómé e'yale bé nsəl. ²⁷ Dyöb ánəne syánē nlém áte, abíí-’ε mewēmtən mé Edəádəŋ áyāle Edəádəŋ ékânnad bad bé Dyöb nyaa eche áhεδεέ. ²⁸ Debíí nén bán dyam-té áde ábenlad Dyöb ábele dó á mboŋ ní bad ábe bédáá mó,* ábe áchénlé ábel ngáne áhεδεέ. ²⁹ Dyöb dēmmad atii nén aá bad ábe mōmmadté apwεd ádāb abé ábê nēŋɡáne abé áde awe Mwǎn ábel boŋ ane Mwǎn ábê Mwǎn á’sō átíntē e baányan. ³⁰ Né-ɔó, bad ábe Dyöb dēmmadté apwεd, anchélé bó ábē ábē bad. Abe áchénlé-’ε ahóbé aá békóbnédé áwe e’só, ábe bó-’ε békóbnédé áwe e’só, abagé bó éche ehúmé.

Dyöb ádáá syánē mbwiined ne Yesu Krístə

³¹ Nzé denəné mímén mekan mésyāal áte, cheé déhele dehób? Nzé Dyöb ádé ne syánē, né nzé ahele atəŋɡén syánē? ³² Néε Dyöb déebāŋneé ké awe Mwǎn. Antéd mó, ábe mó aá áwê á nló míme syánē moosyāal, né éebaá syánē kéchéé émpēe éche déhédné mó-yε? ³³ Nzé-módé áhōb aá bad ábe Dyöb ápwédé békwédé nkáá? Dyöb dən dóo áhōbē nén aá dedíi bad ábe békóbnédé áwē e’só. ³⁴ Nzé-módé-ε áhōb aá dekwédé nkáá? Yesu Krístə awédé, ápuu, adyεε-’ε á ekáá émbáá é Dyöb, áhed-táá ákânnadté syánē. ³⁵ Nzéé-ε ahele ábēl boŋ Krístə asóg syánē adəŋ? Mekan míme mélénlédé syánē áte, ké’ε ndutul, káa ahé áde bad béhāɡkē syánē á meséb? Nzaa, káa awóŋ áde déwōó’é mbóté? Nzé-’ε akíme áde bad békímmεé syánē?

* **8:28** Dyam-té áde ábenlad Dyöb ábele dó á mboŋ ní bad ábe bédáá mó; doŋge á kálag áwóó mam mésyāal mébenlad á mboŋ míme bad ábe bédáá Dyöb.

Ké'ε awúu áde bad béhedeé syánē awúu? ³⁶ Kálag e Dyöb ehóbé aá,
 “Póndé téé bad béwúε sé áyāl echōη.
 Bényíne sé nêηgáne rídyōη mí mbód míme békagké
 awúu.”

³⁷ Mmén mekan mésyāāl mébenlad boη detómé mó áte, mbwiined ne Krístəə, mó awě adəə syánē boη áwōηgān-ne syánē. ³⁸ Mbíí bwām nén meé chōmchōm éesaá éche éhεle-ε épāη edəηge éche Krístəə ádáə syánē. Ken kwééd-ε, ké'ε alongé. Ken ángel-ε, ké'ε benkamlεε, ké'ε ngíne éche édé ádyōb. Ken póndé eche dédíí áte nén, ké'ε póndé echě ehúε. ³⁹ Ké ngíne e nkoη mímín, ké'ε e nkoη rísé, chōmchōm éesaá átínté e nhəgtéd rísyāāl éche éhεle épāη edəηge éche Dyöb áwōηné syánē mbwiined ne Yesu Krístəə, awəd Sāηgwéé.

9

Dyöb ne abē bad bé Israel

¹ Nkale' mbále nêηgáne mod awě adúbpe Krístəə, meékālēē metóm. Mmém nlém míme Edəədaη éche Esáá élyágtεé, rílāηge me nén aá chōm éche ríhóbéé édé mbále. ² Ndutul e ngíne ne metake mé ngíne bédé me á nlém-tē ³ áyāl e ábēm bad, ábēm baányanη ábe syāābōō sēdé mekií mehóg. Ayāl echáb nhεde' nén meé né Dyöb dēmbě me ebómán, ábēl-ε meebág ne Krístəə. ⁴ Abēm bad bédíi bad bé Israel. Dyöb áhóbé aá mótdē bó néε ábē bān, alúmté-ε bó éche ehúmé. Dyöb dēmpě á nchemtεn ne bó, ábε-ε bó mbéndé. Anlúmed bó ngáne bétāηgéné mó edúbé abε, bó-'aá ánlāā'ε aá móōbelé chōm éche ánhōbpē aá móōbēl. ⁵ Bédíi bad bé mbyaa míme ábēd betaa ábe bēmbē se á

mbooted. Ade Krīstəə áchyaáadté-'aá, mómpē nēe moonyon, áwāb mbyaa dōo ámbídtē. Mekenag mébê ne Dyöb á ngíndé ne á ngíndé, mó awě ákamlan chöm ásyā̄l. Ebê nê.

⁶ Meehóbéé nén meé Dyöb déebenlé chöm éche ánhōbpē aá mōōbēl. Edé bán saké bad bésyā̄l ábe bébídé á mbyaa ní Israel bédé bad bé Dyöb. ⁷ Saá-kaá bán bésyā̄l ábe Abrahamε bédé bán bé Dyöb. Dyöb dénlāā Abrahamε aá, “A mbyaa míme awon mwān Aisige dōo bán ábe ríhóbé meé mēbē we bēbídte.” ⁸ Nén álúmte nén bán bán ábe béchyaá á nyaa e moonyon béesaá bán bé Dyöb. Bon bán ábe bēnchyaā'é nhídtēn ne ngáne Dyöb dénlāā'é Abrahamε aá mōōbēl, bōo bēkoo'é atón nēngáne bán bé mbyaa míme Abrahamε. ⁹ Ade Dyöb dénlāā'é Abrahamε aá mōōbélé mó dyam áde móhóbé, Dyöb dénhōb aá, “Mětim ámbíd á pónde eche rítíde. Ene pónde Seraa áwālē mwān a mwēnchóm.” ¹⁰ Saá-kaá nê dēmpēn. Sáá nhóg móo Rebekaa ábe bán bé baachóm bébe bēnwōngē. Ane sáá abédéε awesyānē taa, Aisige. ¹¹⁻¹² Á pónde éche béechyaā'é ábê bán, áde béebī'é abel dé mbéb ké'ε mbon, Dyöb dénlāā Rebekaa aá, “Mwān ambáá ábē mbəledε awe mwān asad.” Dyöb dēmbel nén ábel ényínned nén bán míme mewēmtēn mōō ámbenlédte abel mwān nhóg ábe ásē e aníní. Embonéd mó ápwed mod awě ádás apwed, saké áyāle dyam áde ane mod ábélé. ¹³ Eténlédé á kálag e Dyöb ngáne Dyöb áhóbé aá, “Mendāŋ Jakəbe bon ríkōō Esao.”

¹⁴ Chán-nō déhōbpē bōob? Nédē deéhōb bán Dyöb ákwognad baahóg-ε? Aáy, éesaá nê. ¹⁵ Se' bōód, Dyöb dénlāā Mosεε aá, “Měwōg kénzéé ngəl awě

ńdǎá ngǎl awóg, mǎlǔmēd-te e'boŋ bé nlém wée kénzée awě ńdǎá alúmed.” ¹⁶ Né-ǎó, mpwēdtéd ní Dyōb méewóó'é dyamdyam ábel ne chǒm éche bad béhēdēé bán ébenled ké'ε éche bébēléé. Dyōb dǎó ábenlad ábē e'boŋ bé nlém ábel kéchéé éche áwémténé abel. ¹⁷ Eténlédé á kálag e Dyōb nén bán Dyōb dénłā Farao aá, “Mpwēde wε kǎŋ ábel boŋ nǐbenled wε álúmed echem ngíne ne ábel boŋ ádēm dīn ákanled nkōŋsé áte ńsyāǎl.” ¹⁸ Né-ǎó, Dyōb álúmtē' ábe e'boŋ bé nlém wée kénzée awě ápwédé, áwēdē-ε kénzée nló áte awě ápwédé aá áwúu nló áte.

Meliŋgá mé Dyōb ne e'boŋ bé nlém é' Dyōb

¹⁹ Kapóg nyé mod nhóg nyéēsēdéd me bánken, “Nzé nē dǎó édíí, cheé ékǎá boŋ Dyōb ábé áhǎbē' aá bad bébélé mewusé? Debíí bán modmod eéhēlē-sε ahób aá móǎbenlé dyam áde Dyōb áhóbé aá ábel.” ²⁰ Boŋ wε moonyoŋ, nzé-módé édíí áseded Dyōb dyam? Mbeé e mǎg eéhēlē-sε ésēdte' mod awě abelé chǎ aá, “Cheé ékǎá boŋ éhǎgέ me nyaa echě éhǎgέ me?” ²¹ Nyébíí nén bán ntumé-mbeé, awóó kunze ábelen hyǎg ábe ábenléé mbeé nyaa echě ádǎá. Nzé adǎá, ahēlesε atéd hyǎg ábēlēn mbeé ébe; póg ebé mbeé e edúbé, eníníí-ε ebé mbeé echě bébenladté pǎndé ésyāǎl.

²² Kapóg Dyōb áhédé'aá nímē meliŋgá alúmed, áhédé-ε aá bad bényín eche ngíne. Boŋ anched yǎl bwāmbwam áwēsēn bad ábe bēmbēl boŋ áliŋ. Abe bad béntǎŋgēn-ne nkógsēn akud. ²³ Kapóg-ke Dyōb dénwēmtēn-ne álúmed éche ehúmé é ngíne ámīn e bad ábe álúmté e'boŋ bé nlém. Amaá ábē bad aboŋsēn ákud éche ehúmé. ²⁴ Syánē dedé-ε áfinté

e ábê bad ábe áchénlé. Saá-kaá átíntê e bad bé Israel dēmpen dōo áchénlé syánē. Achénlé syánē donje á bad kááŋne átíntê e bad ábe béesě bad bé Israel. ²⁵ A kálag e Hoseya, Dyōb áhóbé nén aá,

“Bad ábe bēnkēmbé ábēm bad, mēchəg bó mēé bédé ‘Ábēm bad.’

Aloŋ áde ménkēndəŋgé mēchəg dō mēé ádíi ‘Aloŋ áde ńdǎá.’

²⁶ Melemlem mé hōm wéé ménlāā-’aá bó mēé ‘Nyéēsaá ábēm bad’,

áhed-taá méchəgké bó mēé bédíi ábēm bǎn, bǎn bé Dyōb áde ábage’ aloŋgé.”

²⁷ Nkal é’dǎədəŋ Yesayaa anhǎád tǎŋgəne bad bé Israel aá, “Ké mesonje mé bad bé Israel mēmbuú áte nēé nsíi mímé ńdé á nkəg mé edib é nkwe, nguse chēmpen chíó ékūd e’sooson.

²⁸ Sǎŋgwéé éebébdé pónde ábel mekan mésyāāi mímé átómté mbakú aá mósǎbēl á nkōŋsé.” ²⁹ Nén áde nēŋgáne Yesayaa ánhǎbpē aá, “Nzé Sǎŋ Dyōb á Ngumε enkēnlyǎgnéd syánē donje dé nchyáátén, né debágáá nēé myad mé Sodom ne Gomora.”

Paale akánnédé bad bé Israel

³⁰ Chán-nō déhǎbpē bǎb? Bad ábe béesě bad bé Israel bétímé békóbnédé á’sō é’ Dyōb mbwiined ne adúbe áde bédúbpé Krístǎ, kénéé édíi bǎn béewane’aá áte ákobned á’sō é’ Dyōb. ³¹ Boŋ bad bé Israel bėwáné’aá áte bėhédé bǎn bėhíd mbéndé ábel boŋ bėkobned á’sō é’ Dyōb, boŋ bėnkēnhénlé.

³² Cheé ékǎá boŋ bėnkēnhǎl? Bėnkēnhénlé áyāle nén bėwáné’aá áte ákobned á’sō é’ Dyōb áyāle nsón míme bēn bėbélé saké áyāle adúbe áde bédúbpé Dyōb. Bėnkǎd ekuu á aláá áde bad bėkǎdé ekuu,

békwē-’ε. ³³ Eténlédé á kálag e Dyöb tâηgene nê, nén bán,
 “Nyénone’, mbanne aláá á Zayon
 áde débël bon bad békodé ekuu,
 aláá áde débël bon bad bék wag.
 Bon kénzée awë adúbpé mó éehúú’é ne mekáá mé
 ngên.”

10

¹ A-baányan, ndáo ne nímém nlém rísyāāl nén meé ábém bad bé Israel békud e’sooson, nkánnad-
 τε bó meé nê abenled. ² Mbíde bó mbón nén meé
 bédáá Dyöb abele ne nlém rísyāāl. Bon béekoo’é
 asōηten ngáne bétāηgéné mó abele. ³ Béēsōηtenē
 ngáne Dyöb ábeléé bon bad békobnéd áwe e’só.
 Bétímé béhede nzii echáb chēn echē ébël bon
 békobnéd á’sō é’ Dyöb. Né-óó, béesudτεé yāl áhíd
 nzii echē Dyöb átíídé ábel bad békobned áwē e’só.
⁴ Krístæ abelé nsón míme mbéndé éntāηgēnnē abel,
 né-óó, kénzée awë adúbpé mó, akobnad á’sō é’
 Dyöb.

E’sooson é’bágnédé ne metúmbé mésyāāl

⁵ Se’ bód, Mosεε antēl tâηgene akobned áde
 mod ákobnadté á’sō e’ Dyöb áyāle áhídeé mbéndé.
 Anhób aá, “Kénzée awë abele chōm ésyāāl éche
 mbéndé éhóbéé, áküd alongé áde déemaá’.”
⁶ Bon éténlédé á kálag e Dyöb bán nyaa eche
 adúbe ábeléé bon mod ákobnéd á’sō é’ Dyöb edii,
 “Weehóbé áwon nlém-tê nén wεé, nzé-módé ákē
 ámín, ádyōb.” (Nédē, áhúd Krístæ ámín, ásuded
 mó ásē.) ⁷ Ké-’ε “Nzé-módé ákē ásē á echóg éche
 éewóo asóg?” (Nédē áhúd Krístæ á echóg éche

éewóo asóg âπεεν mó ámbīd á alongé.) ⁸ Chōm-έε kálag e Dyōb ehóbé édīi nén aá “Eyale é Dyōb édé we benben. Edé ekale chό, édé-’ε we á nlém-tê.” Mmê nkalan̄ rídīi nkalan̄ míme sékaleé nén bán nyêtánǵéné adúbe awón̄. ⁹ Nzé ehóbné nsəl nén weé, Yesue adīi Sánǵwéé, edúbpé-’ε awón̄ nlém-tê nén wě Dyōb dêmpuúd mó, né wěkūd e’soóson̄. ¹⁰ Ayále nén nzé edúbpé á nlém-tê, Dyōb ábele’ ékobnéd áwe é’sō. Nzé ehóbné nsəl ne weé módúbpé, ebelé ékūd e’soóson̄. ¹¹ Kálag e Dyōb ehóbé nén aá “Kénzée awě adúbpé mó, éehúú’é ne mekáá mé ngên̄.” ¹² Nén adé ne moosyǵál, ken mod adé mod a Israel, ken mod eesaá mod a Israel. Dyōb adīi Sánǵwéé a moosyǵál nyaa póg, abude-’ε kénzée anamed awě ahědné mó nwōn̄gen̄. ¹³ Kálag e Dyōb ehóbe aá, “Kénzée awě achəgé dīn áde Sánǵwéé aá áson̄ mó, ákūd e’soóson̄.”

¹⁴ Boñ chán béhele béchəg mó bán áson̄ adāb alongé áde béedúbpéé mó? Chán-ne béhele bédúbé mó, nzé béewóge mímē nkalan̄? Chán-nō béhele béwóg mímē nkalan̄ nzé bad béekanle bó mó? ¹⁵ Chán-ne bad béhele béke bėkanlé bad mímē nkalan̄ áde mod éelóméé bó? Eténlédé á kálag e Dyōb nén bán, “Nzé mod apééné nkalan̄ mí bwām, ébelé épēēn enyīn̄ge.” ¹⁶ Boñ saké moosyǵál akobé nkalan̄ mí bwām. Nkal é’dəədəñ Yesayaa mwēn anhób tñ̄gene nê aá, “A-Sán, bó ahée adúbpé nkalan̄ míme sékálé?” ¹⁷ Né-óó, adúbe ápag ne awóg áde mod áwógé nkalan̄, bad bétánǵéné-’ε nkalan̄ míme Krīstəə akal boñ bad bédúbé mó. ¹⁸ Boñ ndəə asēded nén mēé ken, édé mbále nén bán bėnkēnwógké mímē nkalan̄-ε? Bėnwōg mó bwām. Eténlédé á kálag e Dyōb nén bán,

“Ehób éche bad ábe békálé’áá nímê nkalan
énwōgnēd nkōḥsé áte ṛsyā̄l.

Abāb e’yale bēmpĕ mesóg mé nkōḥsé áte mésyā̄l.”

¹⁹ Ndə́ asɛded nén meé ken, bad bé Israel
bénkēnsóḥténné nímê nkalan-ε? Mosεε móo
asébpé ahób nén aá Dyōb ahóbé aá,

“Měnaméd bad ábe béekoo alonj abé, ábel bonj
nyéwóon bó kónjí.

Meenaméd bad ábe bédé eyókél ábel bonj nyélinj.”

²⁰ Nkal é’də́dəḥ Yesayaa mómpĕ ankwentén ahób
ngáne Dyōb dénhōbpĕ. Anhób á t̄l e ékwéε aá,

“Bad ábe béehede’aá me bényiné me.

Menlúméd ȳl wéε bad ábe béesdte’aá me.”

²¹ Bonj Yesayaa anhób t̄ḥgene bad bé Israel aá
Dyōb ahóbé aá, “Bootya mbwεmbwε káḥj ne
ngukél, nlyágé mekáá meé ábēm bad bétim ámbīd
áwēm, bonj béwúú nló áte, bééwōgné-’aá me.”

11

*Dyōb déebáa’é ábē bad bé
Israel á ȳl ne abáḥj ásyā̄l*

¹ Bə́b-ṛə́, ndə́ asɛded nén meéken, Dyōb ábáá
ábē bad áyāl-ε? Eesaá nê. Mmĕn ndii mod
a Israel awĕ abídé á mbyaa níme Abrahamε, á
túmbé e Benjamin. ² Dyōb déebáa’é ábē bad
áyāl. Bédii bad ábe ápwédé se á mbooted. Nyĕbíí
chōm éche éténlédé á kálag e Dyōb ngáne Elaijaa
ácháá’áá Dyōb, álāḅgē mó mekan níme bad bé
Israel bēbélé’áá. ³ Anláá Dyōb aá, “A-Sánj, ábén bad
béwúú ábonj bekal bé’də́dəḥ bésyā̄l, bépántéd-
te nímōḥj menyán mé mende. Mmĕmpen-εé
nlyágé, béhede-’ε mémpĕ awúu.” ⁴ Chán Dyōb

dēnkwenténné mós? Ankwentén mós aá, “Mbänné bad ekálé saámbé ábé ábēm bad. Bédíi bad ábe béebagé Baalε, dyōb dé metóm, edúbé.” ⁵ Nê dós édíi káēη ne bōob. Nguse é bad bé Israel édíi édé ábe Dyōb ápwédé ne nímē nsimé. ⁶ Apwεd áde ápwédé bós ádíi áyāle nímē nsimé saké áyāle mekan míme bébélé. Nzé émbē nén bán dyam áde bad bébélé dós ákæη bon Dyōb ápwεd bós, nédē né saké nsimé mós ápwédné bós. ⁷ Cheé-ō nén álūmteε? Bad bé Israel bēnkēnkudté chōm éche békóó ahεd. Bad ábe Dyōb ápwédé bēnkūd chōm éche béhédé’áá, bon ábíníi, nlém ménlél bós á abum. ⁸ Eténlédé á kálag e Dyōb nén bán

“Dyōb dēmbel bós edimdim.

Káēηne e’chii, béēnyīnnēē, béewógné-’aá.”

⁹ Dabide mómpe anhób aá,

“Nkânne’ nén meé ébel bwēm ábe é’wógte bós menyīnge, bóbó é’bê bós nēε melám.

Nkânne nén meé, bεkwε, Dyōb ákógsen-ne bós, áyāle mekan míme bébéléε.

¹⁰ Nkânne nén meé Dyōb ákwid bós ndím ábel bon béehelé anyīnen.

Nkânne nén meé ápēmted-te bós nted míme nídelé míme ményāg bós mbíd pónde ésyāal.”

¹¹ Né-ōs, nsedte nén meé ken áde bad bé Israel bēnkōdté ekuu bon bεkwε, bēnkwε ne akwε ásyāal-ε? Aáy éesaá nê. Abel áde bēmbenlé mbéb dēmběl Dyōb dēmbě bad ábe béesě bad bé Israel etál ákud e’sóoson, ábel bon bad bé Israel bébê kónjí. ¹² Akwε áde bad bé Israel bēnkwεé, ápíínédé bad bé nkōηsé ábíníi bésyāal nsimé híin. Abé-’ε áde bad bé Israel bémbēē atóg áyāl e mekan mé edáédāη dēmpiínéd bad ábe béesě bad bé Israel

nsimé ní Dyöb. Nzé Dyöb áhële áṗē bad ábe béeesě bad bé Israel anamed nê, áde bad bé Israel bébélé mbéḅ, né chán-nō nnam mépēé abé míme ábeé áde bad bé Israel bésyāāl békudté e'soóson.

*Bad ábe béeesě bad bé Israel
béēbāg kúmbe áyāle békúdé e'soóson*

¹³ Chōm éche níhedeé ahób nén bōob, nyé bad ábe nyéēsě bad bé Israel, nyéē nílāngéé. Ndíi mbapēe a nlómag a bad ábe béeesě bad bé Israel, né-óó mbage' mímēm nsón edúbé ésyāāl. ¹⁴ Kapóg nhelé mbēl bānned bé Israel bébê kónjí bó donje á bad bómpē békud e'soóson. ¹⁵ Abánj áde Dyöb démbāngē bad bé Israel á yāl démbēl Dyöb dēntim ásē ne bad bé nkōḅsé bésyāāl. Bōob-pōó, chán-nō ébēē áde Dyöb dékobpé bad bé Israel ámbíd ámpē née ábē bad? Ebē byánán bad ábe béwédé bépúúdé ámbíd. ¹⁶ Nzé bébágé Dyöb eped é ewele é'sō née mende, nê alúmte bán éché ewele ésyāāl édii échē. Nzé bébágé-'e Dyöb nkanj mí bwel, né ngen chómpē edii échē.

¹⁷ Bépagké donje á ngen á bwel é menzab ábe béwéné, bébādtē á ngen é bwel é menzab ábe é'kwoge' á ahín-tē. Nyé bad ábe nyéēsě bad bé Israel nyédíi nēngáne éché ngen é bwel bé ahín éche chómpē ekude mendíb míme mébídé á nkanj mí bwel é'bwām. ¹⁸ Ngáne édíi-'aá nê, nyéetāngeneé née nyédíi kúmbe se nyénōné échíní ngen éche bésélé, nkóḅté. Nzé nyédé kúmbe nyéēchatán nén bán saké nyé nyéchāngé nkanj boḅ nkanj móó níchāngé nyé. ¹⁹ Nyéhēle nyékume' ekáá á tāl bán béhúdé éché ngen ábel boḅ bébáde nyé áhed. ²⁰ Nê ádé mbále. Béhúdé bó áhed áyāle bénkēndúbéé, nyé-'e bétímté nyé áhed áyāle nyédúbpé. Boḅ

nyéebág kúmbe. Boŋ pɛn nyébê mbwóg. ²¹ Née Dyöb dɛnkɛmbánǵé bad bé Israel akógsɛn, bó ábe bédé nêŋgáne nɛn éche énsɛbē abé, nyêwɛmtan bán ábāŋ nyé akógsɛn-nɛ? ²² Nyényíne nɛn bán, pɛd póg Dyöb ábóó nlém, pɛd eníníí-’ɛ alélé áte. Alélé áte wée bad ábe bépáné nzii boŋ abðŋné nyé nlém nzé nyêdé nyêhíde’ eche nzii. Boŋ nzé nyéehíde chó, né áhūd nyémpɛ. ²³ Nzé bad bé Israel ámpɛ bétédte ábab e’wúu bé nló áte boŋ bétímné Dyöb, Dyöb dɛtéd bó ámbíd ámpɛ. Awóó ngíne ábɛl nê. ²⁴ Nyé bad ábe béesǵ bad bé Israel, nyé ábe nyêdé nêŋgáne nɛn e bwɛl bé ahín-té, née Dyöb áhélé nyé ahúd á bwɛl bé ahín-té, abádé nyé á bwɛl ábe bɛwéné, nyêwɛmtan bán ééhɛlɛɛ-sɛ atéd bad bé Israel átímed bó ámbíd áhed ámpɛ-yɛ? Bad bé Israel bóó bédé nêŋgáne nɛn e bwɛl eché ensébé abé áyāl e ábê bwɛl.

Dyöb áwóge’ moosyáal ngəl

²⁵ A-baányan, nhɛde mɛé nyésòŋtɛn dɛm áde kááŋne bɔɔb modmod éesòŋtɛnɛɛ, ábɛl boŋ nyéewémtán bán nyétómténé debyéé awóŋ. Nhɛde mɛé nyésòŋtɛn bán e’lɛl bé nlém á abum ábe donǵe á bad bé Israel bɛbē kááŋ né bad ábe béesǵ bad bé Israel ábe bédúbɛ bésyáal, bédúbɛ. ²⁶ Nɛn débenléd ábɛl boŋ bad bé Israel bésyáal békud e’soosɔŋ. Eténlédé á kálag e Dyöb nɛn bán, “Nsoode ábíd a Zayɔn. Abðdéd abé dé mbéb áde mbyaa níme Jakɔbe níwóó.

²⁷ A pónde eché mébðdédte nímad mbéb dóó mépɛé á nchemtɛn ne bó.”

²⁸ Bad bé Israel bédé bad bé ekɔyí bé Dyöb bɔɔb áyále bédúbɛpɛé nkalan ní bwám, nɛn ábenlédé

âbel bon nyé bad ábe nyéēsě bad bé Israel nyékud e'soóson. Kénéε édíí nê Dyöb ápwédé bad bé Israel, adíí adáá-'ε bó áyāle melě níme ámmwēε ne ábāb betaa. ²⁹ Nén adé áyāle nzé Dyöb apwédé mod bon anāmté mó, né apwédé, anāmté-'ε mó. ³⁰ Bóód, nyéε nyênwúén Dyöb nló áte, bon bōob awúen áde bad bé Israel béwúéné Dyöb nló áte, ábélé Dyöb áwógé nyé ngal, awóηgén-ne nyé áwógen mó. ³¹ Né-óó bōob, bad bé Israel híin béwúéné Dyöb nló áte. Dyöb déwōg bó ngal, awóηgén-ne bó áwógen mómpē. Abel nê âbel bon áwōg bómpē ngal melemlem ngáne ánwōgkē nyé bad ábe béesě bad bé Israel. ³² Dyöb ábélé e'wúu bé nló áte e' bad e'dé néε é'hédé bó á mbwōg âbel bon áwōg bó baásyāīl ngal.

Bad béε Dyöb mekenag

³³ Nyénōne' ngáne Dyöb ápédé nhon abé! Nyénōne' ngáne abíí mam mésyāīl, awóη-'ε debyéé áde áchábé ámīn. Modmod éēhēlēε-se asóηtén ngáne Dyöb ábeléé mam. Modmod éēhēlēε-se asóηtén-ne nyaa eche Dyöb ábeléé mam. ³⁴ Eténlédé á kálag e Dyöb nén bán

“Nzé-módé ahele se abíí mewēmtēn mé Dyöb.

Nzé-módé ahele aléb Dyöb.

³⁵ Nzé-módé akébě Dyöb chōm

âbel bon Dyöb ásábe mó ámbíd.”

³⁶ Dyöb dōó áhágé bwēm ésyāīl. Mó akáá bon ábē bwēm é'syāīl é'bé. Mó-'aá awóó ábē bwēm é'syāīl. Ehúmé ébê ne Dyöb á ngíndé ne á ngíndé. Ebé nê.

12

Nyaa echě éhɛdnadté bán alongé á bad bé Krīsto ábê

¹ Né-ɔ́, a-baányan, ngáne Dyõb áwógé syánē ngal bwámbwam, ncháa' nyé mɛé nyébê née mende míme médé á alongé. Mmê mende mészán, mékobned-te ne Dyõb. Nén dɔ́ adé nyaa echě éhɛdnadté bán nyébage Dyõb edúbé. ² Nyéehídé' mbeltéd mí bad bé nkõjsé. Boŋ nyémwɛ Dyõb áhəŋlɛn nyé nlém á abum, ábel nén nyéwõŋ abé dékɔ́lɛ. Nê débɛl nyéɛsõŋtɛn nyéhídɛ-'ɛ mam ngáne Dyõb áhɛdɛé. Nyéɛbɪ́ mboŋ, nyébíí mam míme méwógte Dyõb menyinŋe, nyébíí-'ɛ mam míme métəŋgéné.

³ Ne nsimé míme Dyõb ábágé mɛ, nləŋge nyé nén mɛé, nyé modmod eenyíné yəl aá mótõmtɛnɛ abé tómaa ngáne módíí. Boŋ mod-té ányín yəl ngáne ákóó abé. Mod-té ányín yəl nchoo ne ndɛ echě Dyõb ábágé mó née mod awé adúbpe. ⁴ Yəl e moonyon edíí póg, ewóó pág ne pág, pág tɛé-'ɛ ewóó míme nsón. ⁵ Melemlem nê dɔ́ edíí ne syáá bad bé Krīsto. Debuú áte boŋ dedíí yəl póg ne Krīstə, syáá modmod eésáá ne mó mwɛn. ⁶ Dyõb ábénlé mímɛ nsimé ábe syánɛ mod té echě ndɛ, ékábnɛ-'ɛ áte. Nzé Dyõb ábágé mod ndɛ áhób mekan á dɪn á Dyõb, ane mod áhɔ́bɛ' mímɛ mekan nchoo ne adúbe áde áwóó. ⁷ Nzé mod awóó ndɛ ábele bad, ábenle bó. Mod awe mɔ́-'ɛ awóó ndɛ áyáged, áyágte bad. ⁸ Mod awé awóó ndɛ áwéd bad nlém á abum, áwéde bó nlém á abum. Mod awé awóó ndɛ ábided chõm á ekáá áwõŋgen bad, áwõŋgan bad, eénɔ́nɛ ámbíd. Awé awóó ndɛ ályáged bad, ályágte bad nyaa echě etəŋgéné. Mod

awě mós-ε awóó ndε âwóg bad ngəl, áwóge bad ngəl ne menyinje.

⁹ Mod téé ákoη bad adəη. Mod téé ákoo ebébtéd. Mod téé ásum mekuu âbel dyam á bwâm. ¹⁰ Mod téé ádəη mwănyan ne nlém řisyāāl. Mod téé ábage waáb edúbé tómaa ngáne ábageé eche yăl. ¹¹ Mod eéchēdē yăl âbel nsón. Mod téé áwēd mekáá áte, ábenle-ε Sāngwéé ne nlém řisyāāl. ¹² E'lyóg bé nlém ábe mod téé awóó ábéen bó menyinje. Mod téé áched yăl á metake-tê. Mod téé áwεsen-ne á mekáne-tê. ¹³ Atíntê e nyé bad bé Krísto, nzé nyé mod nhóg atógé chóm, waáb awě awóó chó awónjén mós. Kénzée awě apedé áwēn, nyékōb mós nken bwâm.

¹⁴ Nyékānne nén bán Dyōb ánamed bad ábe béhéde nyé á meséb. Nyéekānné nén bán békud ebómán, nyékānne dásō bán Dyōb ánamed bó. ¹⁵ Nyéwōg menyinje ne bad ábe béwógé menyinje, nyéleb-pε ne bad ábe bélebe'. ¹⁶ Nyébê nsəl nhóg ne nhóg ne aníní. Nyéenyēnē dúu ámín. Nyébê echoη ne bad ábe béesě dyamdyam. Mod eewémtán aá mótōmtēnē debyée awóη.

¹⁷ Nzé mod abelé wε mbéb weétimtán mós mbéb. Boη pen etánjéné éwémtán âbel mboη á'sō é' bad bésyāāl. ¹⁸ Mod téé áhed nzii ábé nsəη ne moosyāāl. ¹⁹ A-baányan, nzé mod abelé nyé dyam dé mbéb, nyé bēn nyéētimtán mós. Nyétéde Dyōb děn ákōgsen mós. Nhóbe nén áyāle, éténlédé á kálag e Dyōb nén bán, Dyōb áhābē aá, “Me-εé ntímtan mbéb ké říhéé nímé mod ábélé. Me Sāngwéé me-εé nhóbe'.” ²⁰ Eténlédé á kálag e Dyōb hóm démpēe pen bán, “Nzé nzaa ewag ábōη bad bé ekoyí, ehé bó ndyééd, nzé píđ ekóbe bó, ébe bó chóm éche

bémwákē. Nzé ebélé nê, ekwágte bós, béhédé-'e nzii eche béhəŋlanné." ²¹ Mod eémwāg-se mbéb ríkamlán mós. Boŋ rímēn mboŋ rítóm mbéb áte.

13

Nyébage benkamlene edúbé

¹ Mod téé áwógne benkamlene ábe békamlan mós. Ayāle nkamlən ké nhóg méesaá míme Dyöb déetiideé. Dyöb dós-'aá ábánné benkamlene bésyāā́l á atii. ² Né-óó, kénzée awě eewógné' mod awě akamlan mós, né eewógnée ntii ní Dyöb. Bad ábe bébele nê, béhédte yāl nkógsen. ³ Bad ábe bébele bwām, béewógēē benkamlene mbwóg. Boŋ bad ábe bébele ebébtéd bós béwóge benkamlene mbwóg. Nzé weéhédē wéé móbāŋ nkamlene, ebélé mekan mé bwām. Nzé ebélé nê, né ákēmtē wē. ⁴ Nkamlene adíi mbəlede a Dyöb awě Dyöb ábánné áwōŋgen wē. Boŋ nzé ebele mekan mé mbéb étəŋgéné mós abāŋ, áyāle ngíne echě áwóó ákógsen bad eesaá ngēn. Adíi mbəlede a Dyöb awě Dyöb ábánné ákógsen bad ábe bébele mekan mé mbéb. ⁵ Né-óó, mod atəŋgéné benkamlene awógen, saké áyāle ábáa'ē nkógsen dēmpen, boŋ káəŋne áyāle ábíi nēn aá míme nlém rílāŋgé mós aá mótəŋgēnē abel nê.

⁶ Né-'aá, nyétəŋgéné tááse ámpē asaa, áyāle Dyöb dós bad ábe bésəŋte tááse bébenléé. ⁷ Nyésáppe mod téé chōm éche nyétəŋgéné mós asábe. Ken tááse-yē, ké'ē mōné ké ríhée míme bélāŋgé nyé bán nyésábe áyāle bwēm ábe nyéwóó. Nyébáa bad ábe nyétəŋgéné abāŋ, nyébage-'e bad edúbé ábe nyétəŋgéné edúbé abe.

Nyédəŋ nhóg ne aníní

⁸ Mod eewánlé modmod alúm. Alúm áde nyé mod téé átəŋgéné awáale ádíi ádəŋ nhóg ne aníní. Kénzée awě adəə waáb, né alónté mbéndé esyā́l.

⁹ Mbéndé édé nén bán, “Mod eekábé asón á ndáb e e’wóngé. Mod eewúé mod, mod eechíbé. Mod eesíídé chòm é mod.” Echén mbéndé ne échíní esyā́l ch́óó éládné boŋ ébé mbéndé póg. Ene mbéndé edíi nén bán, “Dəŋ mwănyoŋ ngáne édáá echoŋ yắl.” ¹⁰ Nzé mod adəə mwănyoŋ eébéłēē mó mbéb. Né-ɔ́, edəŋge élónte mbéndé esyā́l.

¹¹ Ngáne nyébíí-’ε nén bán pónđé emaá ape echě nyétəŋgéné akábned, nyétəŋgéné akábned, áyā́le pónđé e e’soósoŋ eche syánē edé benben tómaa ngáne énsēbēē abé áde dedúbpe Krístəə dúbpen. ¹² Ehíntén éməáá ape, b́in é’kwógé asáa. Né-ɔ́, déteede mbeltéd mé mbéb míme débélé’áá. Déwáa bwēm é’ nzum áwan nzum e e’nyínen bé ekíde. ¹³ Déwáale abé á bwâm née bad ábe bédé á e’nyínen bé ekíde. Nyéékāg á ngande éche bad bémwākē ḿim boŋ mékōbē bó, nyéekábé mesón. Nyéébēłē-’ε e’tongé é’mekan. Nyéēsɛnlé’, nyéebāg-ke kónjí. ¹⁴ Boŋ nyéwōŋ abé áde Səŋgú Yesu Krístəə. Nyéébāgē mekan mé esíí mé ekob é yắl etál, nyéébēłē ngáne échēn ekob é yắl éche ébelte nyé mbéb éhedeé aá nyébel.

14

Mod eekáadté waáb

¹ Nyékobe bad ábe adab adúbe déewúú’é áte. Nyéepəntān-ne təŋgene mam míme bəwəmténé nén bán bétəŋgéné abel, ké’ε bəetəŋgené abel.

² Adúbe áde doŋge á bad ábágé bó etál ádyé kéchéé

bon bad ábe adúbe déewúu' é áte, béedyākē donje á bwēm. ³ Bad ábe bedyāg kéchéé béenyīnē bad ábe béedyāg donje á bwēm nkóntéd. Bad ábe bó'ε béedyāg donje á bwēm béekāadtē bad ábe bedyāg kéchéé áyāle bó moosyāál békóbnédé ne Dyōb. ⁴ Nzé-módé édíí ákáad mbaledε a mod ampée? Eche Sánj chèn chóo étánǵéné ahób aá dyam áde ábélé áde bwām ké'ε déesaá bwām. Bon Sánǵwéé eche ngíne ěwōngēn ane mbaledε ábel dyam á bwām. ⁵ Bad behóg bétédé donje dé e'pun bán áde etógnén tómaa ábíníí e'pun. Bad behóg-ke bétédé nén bán e'pun é'syāál é'díi nyaa póg. Mod-té átêd nén aá kéchéé éche mówémténé, étánǵéné ne mó. ⁶ Bad ábe bétédé bán epun ehóg édé etógnén tómaa ábíníí e'pun, bébele nê ábe Sánǵwéé edúbé. Bad ábe bó'ε ámpē bedyāg kéchéé, bómpē bébele nê ábe Sánǵwéé edúbé áyāle béságnan Dyōb áyāl e ene ndyééd. Bad ábe bó'ε béedyāg donje á bwēm, bómpē bébele nê ábe Sánǵwéé edúbé, béságnan-ne Dyōb. ⁷ Syánē modmod eésaá á alongé ne mó mwēn, modmod eewág-kaá ne mó mwēn. ⁸ Nzé dedé á alongé, né dedé á alongé ábel ngáne Sánǵwéé áhédéé. Nzé dewédé-'ε né dewédé áwóged Sánǵwéé menyīnge. Né-ǵó, ken dedé á alongé, ké'ε dewédé, á mekáá míme Sánǵwéé dóo dédíí. ⁹ Nzom echē ekáá bon Krístā awé, ápūū-'ε, abé á alongé, edíí ábel bon ábē Sánǵwéé awě bad ábe bewardé ne ábe bédé á alongé. ¹⁰ Cheé-ō ékáá bon ékáadtē mwānyon? Ké'ε, cheé ékáá bon ényīnē' mwānyon nkóntéd? Ebíi nén wéé syánē moosyāál deétyēēm á nkáásé á'sō é' Dyōb. ¹¹ Eténlédé á kálag e Dyōb bán,

“Dyōb áhóbé aá, ngáne ndíí á alongé,

moosyáál atə̀ngéné me mebóbóŋ abwóge,
moosyáál ákənē-’ε me aá me-εé ndé Dyöb.”

¹² Né-ɔ́, syánē mod téé deétyēem á’sō é’ Dyöb, álaa mó chöm té eche débélé.

Mod eébelté mwǎnyon mbéb

¹³ Né-ɔ́, syánē modmod eekáádté waáb, bon pen mod téé ámad áwē nlém-tē aá móɔ́tə̀ngeneé dyam abel mbéd áde débél bon mwǎnyon ákōd ekuu káa ahún á mbéb-te. ¹⁴ Abé áde rídí mod nhóg ne Sǎngú Yesue, ábélé nkoó abii nén meé ndyééd ké póg eesaa echě eesaa á’sō é’ Dyöb. Bon nzé mod adúbpé aá ndyééd edé echě eesaa á’sō é’ Dyöb, eedyág chó. ¹⁵ Nzé edyág chöm ké éhéé bon nē ábele’ mwǎnyon aníní ebébtéd, né weewánlenéé mwǎnyon edə̀nge. Weémwāg-se chöm éche édyāgkē ebébéed alongé áde mod awē Krístə́ áwédé áwě nló. ¹⁶ Weémwāg-se kunze eche éwóó néé mod awe adúbe áwúú áte, ébél mod ábel mbéb, ábel bon bad béhōbē’ we mekan mé mbéb áyāl. ¹⁷ Saké adyé á ndyééd ne amwé á mím dɔ́o áde etógnén á nkamlen ní Dyöb. Mekan míme médé etógnén médíi áwón abé áde átə̀ngéné á’sō é’ Dyöb, ábé nsan ne ábé menyinge míme ríhúú ne Edə́də̀ŋ éche Esáá. ¹⁸ Kénzée awé abenle Krístə́ nē, akobnad á’sō é’ Dyöb, bad ámpē bébéle béhób bán abele dyam á bwām.

¹⁹ Né-ɔ́ syánē déwéd yəl áte débēle mekan míme mépene nsan, ne míme méwōngan syánē áwéd nhóg ne aníní áte. ²⁰ Ehób é ndyééd eébéle-se nyébébéed nsón míme Dyöb ábélé. Ndyééd ésyā́l ésáá á’sō é’ Dyöb. Bon édé awusé ádyé kéchéé eche ébél bon mod ampée ákwε. ²¹ Ebóó mod eébēlé’

chõm éche éhale-se ébēl boŋ mwānyan akōd ekuu. Ken ádyé nyam-ε, ké'ε ámwé mīm, ké'ε ádyé kéchéé émpēe. ²² Kéchéé éche édúbpé t̄n̄gene nímén mekan, édii átinté e nyé Dyõb. Nnam ne mod awě abíí aá m̄óβελέε dyam áde ádé mbéb t̄n̄gene dyam áde ámáá alúmed aá ábóó. ²³ Boŋ kénzée awě nlém nk̄ogladté á abum nén aá m̄óót̄n̄geneé nyaa e ndyééd p̄óg adyé boŋ átim chó adyé, né Dyõb déh̄ab aá abelé mbéb áyāle eéβenledεé áde adúbe áβel chõm éche át̄n̄gené abel. Nzé mod abelé dyam áde nlém nk̄ogladté mó á abum aá át̄n̄gené káa déet̄n̄geneé, né abelé mbéb.

15

Awoged bad menyinge, saké échedyāl

¹ Syánē awe adúbe áwúú áte, det̄n̄gené née déw̄on̄gené bad ábe adúbe déewúú'ε áte. Deéβēl mekan dásō nyaa echě ebȭn̄édé syánē b̄n̄. ² Syánē mod téé at̄n̄gené née áβelεé mam nyaa echě ewógte mwānyan menyinge, áwéd mó adúbe áte. ³ Ké Kr̄ist̄æ mw̄n̄ eéβele'aá mam dásō nyaa echě ewógte' mw̄n̄ menyinge. Boŋ abelé'áá ngáne éténlédé á kálag e Dyõb nén bán "Nzyȭn̄ ésyā̄l éche bad bésyā́'áá wε, étímnédé mε." ⁴ Mam mésyā̄l míme b̄ntenlé á kálag e Dyõb se' b̄óód, b̄ntel mó áyáged syánē. Nê démbē áβel déw̄on̄ e'lyág bé nlém ábe é'húú ne eyale é Dyõb éche éβele boŋ déwesán, éwēdē-ε syánē nlém á abum. ⁵ Nk̄anne nén mεé Dyõb áde áβele boŋ déwesán, áde áwēde-ε syánē nlém á abum, áβel nyébê á nchemten ne nhóg ne aníní ngáne nyéhídeé Yesu Kr̄ist̄æ, ⁶ áβel boŋ nlatén míme nyédíí mbel nyébê

nsəl nhóg âken Dyöb, Sáá awě awəd Sánjú Yesu Krístæ.

Nyékob nhóg ne aníní

⁷ Né-óó nyékob nhóg ne aníní melemlem ngáne Krístæ ákóbé nyé âbel boŋ bad békene Dyöb.

⁸ Nlânge nyé nén meé Krístæ atimé mbæde a bad bé Israel, âbel boŋ álóned akag áde Dyöb dëmbéé betaa. Nê dénlüméd-te nén bán Dyöb ákale mbále.

⁹ Ampě-’ε âbel boŋ bad ábe béesě bad bé Israel, bébe Dyöb mekenag áyāle ngəl eche awógé bó. Né-’aá éténlédé á kálag e Dyöb nén bán,

“Né-óó měkěŋ we átínté e bad ábe béesě bad bé Israel,

měkōn-ne nkónge áken ádon đín.”

¹⁰ Eténlédé ámpē nén bán,

“Nyé bad ábe nyéēsě bad bé Israel, nyéwógen bad bé Dyöb menyinge.”

¹¹ Eténlédé-’ε ámpē bán,

“Nyé bad ábe nyéēsě bad bé Israel, nyékene’ Dyöb, bad bé nkōŋsé bésyāāl-le békene mó.”

¹² Nkal é’dáádəŋ Yesayaa mómpē ahóbé ngáne éténlédé bán,

“Mod ábid á nchyaátén míme Jesε

awě ápě ákamlən bad ábe béesě bad bé Israel.

Awē-’aá bad ábe béesě bad bé Israel bésummé nlém.”

¹³ Nkánne nén meé, Dyöb áde ábage’ e’lyóg bé nlém âbel nyélôn ne menyinge mésyāāl nyébé-’ε nsəŋ áyāle adúbe áde nyédúbpé. Nê déběł ngíne e Edáádəŋ éche Esáá éběł áden adúbe dékwogé’ akwog ne akwog.

Nzəm echě ekáə boŋ Paale átelé’ enén kálag

14 A-baányan, mmën mbíí bwâm nén meé nyé bën nyêwóó nlém ní bwâm ábel mam míme Dyöb áhedeé aá nyébel, nyêsónṭéné-'ε mam bwâm, nyékwognéd-te áyáged nhóg ne aníní. 15 Bon kénê, donge á mekan áde áde ríténlé nyé á kálag-tê wén. Ntelé mó, ákamten nyé mímén mekan mésyāal ésebán mbáa' dyamdyam. Nsimé míme Dyöb ábágé me mósó mbéleé bon rítelé mímén mekan. 16 Dyöb ábágé me mímé nsimé ábé mbølede awe Yesu Krístæ, ákale bad ábe béesë bad bé Israel nkalanj ní bwâm. Mbele mímén nsón née prise ákal nkalanj ní bwâm míme ríhúú ne Dyöb, ábel nén bad ábe béesë bad bé Israel bébê mendε míme mbágé bon mékobnéd á'sō é' Dyöb. Dyöb dékob bó áyāle Edæádəj éche Esáá ébéleé básáá á'sō é' Dyöb. 17 Né-ṵ, ngáne rídíí ne Yesu Krístæ, nwóó nzom ákum ekáá á tál áyāle nsón míme mbenléé Dyöb. 18 Méēhēlē-se nhób dyamdyam démpēe éetóméé áhób tâṅgene nsón míme Krístæ ábéleé bon ríhēl abel, ábel bad ábe béesë bad bé Israel bébele ngáne Dyöb áhedeé aá bébel. Mekan míme ríhóbé ne míme mbéleé mósó médé mekan míme bétāṅgéné ahób míme bétāṅgéné-'ε abel. 19 Membēl mímé mam á ngíne e e'chemléd ne menyáké, ne á ngíne e Edæádəj é Dyöb. Nén dēmbēl menkāl Nkalanj ní Bwâm míme Krístæ bwâm ngáne ríkágé'áá bootya á Jerusalem ápe á mbwóg e Ilirikum. 20 Nkénwōj nlém ákal Nkalanj ní Bwâm mebwóg míme mod-mod éēpēdēē mbéd átúb dīn áde Krístæ. Membel nê ábel bon meékāg wēe mod ampée ámaa nsón abooted. 21 Nén áde ngáne éténlédé á kálag e Dyöb nén bán,

“Bad ábe béewógé née béhóbé áyāl echê, bényīn,

ábe bó-'ε béēwōgē áyāl echê mbêd, bésōηtēn.”

Paale abelé ntii áke á dyad á Roma

²² Mmén meke míme nkágé'áá mósó mékáo bon meéhēlē ape áwēn. ²³ Bon bōob, ngáne mímádé nsón échén ped é mbwóg, nwóó nlém áte bwâmbwam ápe áwēn, ngáne nkénwōηgē mwě ne mwě. ²⁴ Měbwě áwēn nzé nkag á alon á Spen. Nwóó mewēmtēn meé mēnyīn nyé nzé nkag, meé nyéēwōηgēn-ne me áke áwed. Bon pen, mēdyéé ne nyé mwāmpīn, dehódéd nhóg ne aníníí nlém, bon nkag. ²⁵ Bon bōob, ndé á nzii áke á Jerusalem áke déwōηgen bad bé Dyōb ábe bédé áwed. ²⁶ Bad bé Křisto ábe bédé á mbwóg e Masedonia ne á mbwóg e Akaya bényíné nén bán ébōη bán bēlad mōné bēlóme betóótōkē bé bad ábe bédé átintē e bad bé Dyōb ábe bédé á Jerusalem. ²⁷ Bényíné nén bán ébóó bēbel nē, bán bētāηgéné bó áwōηgen. Ngáne édíí bán nnam míme Dyōb ábágé bad bé Israel, bēbenlad mó ne bad ábe béesě bad bé Israel, ébóó bán bad ábe béesě bad bé Israel bómpē bēwōηgen bad bé Israel bwēm nēηgáne medyé, mōné ne mbóté. ²⁸ Nzé mímádé mímén nsón á Jerusalem, áde mímáá bó mōné abe míme bēládte bó, mēhidé áke á alon á Spen. Ene pōndé dós-'áá métyēēmmē ányīn nyé. ²⁹ Mbíí-'ε meé nzé mpedé, échēm epe ébēl nyéēkūd nnam míme Křistā míme nílóné mbon.

³⁰ A-bānned, á dīn áde Sāηgú Yesu Křistā, ne áyāle edāηge éche éhúú ne échē Edáádāη, ncháa nyé nén meé syánē délad mekáá déwēd me akānned nén bán Dyōb áwōηgen me. ³¹ Nyékānne nén bán Dyōb ánān me ábel nén bad ábe bēédúbpe Křistā bēebelé me dyam dé mbéb ké ahóg nzé

ndé á Judeya. Nyékânne-'ε nén bán mənέ míme mékiinédté betóótókē bé bad átínté e bad bé Dyōb á Jerusalem, békob mó. ³² Ambīd enē dōo mépéé áwēn ne menyinje, nzé Dyōb áhede aá ébê áned, ábel boη ríkóme áte nzé ndé ne nyé. ³³ Dyōb dé nsan̄ ábê ne nyé moosyáál. Ebê nê.

16

Paale alómmé baáb melentεn

¹ Ndəə mée nyébíi bán awe syánē mwānyan̄ a mmwaád Fibii, awě awōηgan ábel nsón á mwembé míme ndé á dyad á Senkria, abele nsón mí bwām.

² Nzé apedé áwēn nyékob mó nken á dīn á Sāηgú ngáne bad bé Dyōb bétāηgéné ábel. Nyébe-'ε mó nwōηgen̄ ké ríhée míme áhédné nyé. Nyébíi bán mómpē akéwōηgen̄ ekud é bad, awōηgen̄-ne me ámpē.

³ Nyéłented me Priskaa bó nchóm Akwilaa ábe syáábōō sébelé' nsón míme Yesu Krístəə.

⁴ Bēnkwentén awé á nló mímēm. Nságnan bó. Saá-kaá mwēmpen̄ nságnan bó, boη káəηne mwembé mímé bad ábe béesě bad bé Israel rísyāál, bómpē béságnan bó. ⁵ Nyéłented me káəηne bad bé mwembé míme ríbome' áwab ndáb.

Nyéłented me awem nsón-a-nlém, Epanetuse, adíi mod awě abedé mod a'só ádúbe Krístəə á mbwóg e Asia. ⁶ Nyéłented me Maria, akébel nsón bwāmbwam átínté echēn. ⁷ Nyéłented me káəηne Andronikuse bó Junia, ábe syáábōō sēdé bad bé Israel, bémbē-'ε á mbwoḡ ne me. Bébyééné bwām átínté e bembapεε bé nlomag, béndūbē-'ε Krístəə boη médūbē.

⁸ Nyélénted με Amplatusε, adii mod awě adé awem nsón-a-nlém awě ndáá á dīn á Sánǵú.
⁹ Nyélénted με káǵhne Ubanuse awě syáábōó sēbenle' Krīstəə nsón. Nyélénted με káǵhne Stakisε, awem nsón-a-nlém. ¹⁰ Nyélénted με Apelεε, awě nímē mbeltéd ní bwâm rínyinnédé nén bán ríkóbnédé ne Krīstəə. Nyélénted με káǵhne bad bé abum á ndáb áde Aristobuluse. ¹¹ Nyélénted με Herodyōne, awě adé awem mwǎnyan a Israel. Bad ábe bédé abum á ndáb áde Nasisuse ábe bédúbpé Krīstəə, nyélénted με bó á dīn á Sánǵú.
¹² Nyélénted με Trifane bó Trifosa, bebaád ábe bébenle' Sánǵwéé nsón. Nyélénted με Pesisε awem nsón-a-nlém, awě akébel nsón bwâmbwam á dīn áde Sánǵwéé. ¹³ Nyélénted με Rufuse, awě Sánǵwéé ápwédé ábele mó. Nyélénted με káǵhne nyaá, atédé με née awe mwǎn. ¹⁴ Nyélénted με Asinkrituse, Flεgōne, Hemεε, Patrobase, Hemase, bǎnned bé Krīsto ábe bóōbōó bébome'. ¹⁵ Nyélénted με Filologuse bó Julia. Nyélénted-τε με bǎnned bé Krīsto bé baachóm, Olimpase bó Neriuse ne mwǎnyan a mmwaád ne bad bé Dyōb bésyāāl ábe bédé ne bó.

¹⁶ Nyéhê nhóg ne aníní tâl ne edǎnge é Krīstəə. Mwembé rísyāāl rílómmé nyé melentēn.

Nlyǎgtén mé asóg

¹⁷ A-baányan, ncháa nyé με-εé nyétéd póndé ne bad ábe béπεεne' nkabén áťinté echên, ábe bépante bad nzii. Býǎgte nyé ayáge áde ápentan ayáge áde nyénsēbēē ayáge. Nyéehídé ábê bad.
¹⁸ Nyéehídé bó áyāle saké awed Sánǵú Krīstəə bébenléé boη pen mam níme mébóhnedé bēn móó

bébeλεέ. Bényinte' nsal áte, béhóbé-'ε mekan átéd bad ábe béésōηtān bwām nlém á abum. ¹⁹ Bad bésyāal béwógé nyaa eche nyésúmé mekuu áhíd nkalaη ní bwām. Né-ός, mbééné nyé menyinje. Boη nhede nén meé nyébíi ábel mekan mé bwām, nhédé-'ε nén meé nyéebíē' dyamdyam tâηgene Abel dé mbéb. ²⁰ Dyöb dé nsal ákwógé Satane ahinten áwēn ekuu-sé. Nsimé míme awed Sāngwéé, Yesu Krístā mbê ne nyé.

²¹ Timotie awé súmō sébele nsón, alómmé nyé melentēn. Lusíase, Jasene, ne Sosipataa, bānned bé Israel bómpē bélómmé nyé melentēn. ²² Me, Tetiuse awē ntenle' Paale enén kálag, mémpē nlómme' nyé melentēn néε awen mwānyal a Krísto. ²³ Gayase alómmé nyé melentēn. Awe ndáb dōó sédíi, áhed-taá mwembé míboméé. Erastuse, nkoó-mōné a dyad, ne Kwatuse, awed mwānyal bómpē bélénté nyé. *

Mekáne mé asóg

²⁵ Syánē débε Dyöb ehúmé áyāle nén áwóó ngíne áwéd nyé adúbe áte. Nê dō-'aá ménlāā'é nyé áde níkanlé nyé Nkalaη ní Bwām tâηgene Yesu Krístā. Mmê nkalaη nídíi mbále eché Dyöb dēnkoó'é se etūn, ekēnlúmédte bad. ²⁶ Boη bōob alúmté syánē. Abídté mō áwed bōob ne mekan míme bekal bé'dáedāη bēntenlé á kálag e Dyöb. Abelé nê ábel boη bad bé meloη mésyāal béwógne mō. Nén ábēnlédé ngáne Dyöb dénhōbpē aá ébenléd. Mō adé á ngíndé ne á ngíndé. ²⁷ Dyöb dēmpēn dōó

* **16:23** Donje á kálag dé'só ábádé nchoo 24: Nê, nsimé míme awed Sāngú Yesu Krístā mbê ne nyé baasyāal. Ebê nê. Kálag émpēé ébádé mímēn nchoo ámbíd e nchoo 27.

áwóó debyéé ásyāāl. Débε mó mekenag áyāle chōm
éche Yesu Krīstæā ábélé, á ngíndé ne á ngíndé. Ebê
nê.†

† **16:27** Donje á kálag áwóó nchoo 25-27 hén ne ámbíd e nchoo 14.23; émpēé éwóó mó ámbíd e nímén nchoo mwěmpen 14.23; donje áwóó mó ámbíd e nchoo 15.33.

Mel̃ Mékō̃lē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022

0143729f-907e-5098-b6ce-63b1629b8e48